

資治通鑑
外紀

—

化圖書館

Library

開化圖書館

Kaishua library

開化圖書館

Kaishua library

開化圖書館

Kaishua library

通

鑑

外

紀

四部叢刊史部

上海涵芬樓藏明
刊本原書板匡高
營造尺六寸七分
寬四寸七分

資治通鑑外紀序

道原好著書志欲籠絡宇宙而無所
遺其著資治通鑑外紀十卷未以傳
人病亟猶汲汲借人書以叅校已之
書是正其失氣垂盡乃口授其子義
仲爲書凡使撰外紀序皇祐初有詔
士能講經義者聽別奏名其中所對

最精詳先具疏次引先儒異說末以
已意斷而論之凡二十問所對皆然
主司驚異擢爲第一及發糊名迺進
士劉恕年十八矣光以是慕重之始
與相識道原乃其字也釋褐鉅鹿主
簿遷和川令英宗雅好稽古詔光
編次歷代君臣事仍謂光曰卿自擇

館閣英才共修之光對曰館閣之士
誠多至於專精史學臣未得而知所
識者惟和川劉恕一人而已上曰甚
善卽奏召之共修書凡數年史事之
紛錯難治者則以誘之光仰成而已
今上卽位賜名曰資治通鑑道原所
編之事皆在通鑑之前故曰外紀焉

光尋判西京留臺奏遷書局後數年
道原至洛歸局中以元豐元年九月
戊戌終官至祕書丞年止四十七嗟
乎以道原之耿介其不容於人齟齬
以沒固宐天何爲復病而天之耶此
益使痛惋愴怳而不能忘者也道原
其先萬年人祖度爲臨川令卒官葬

高安因家焉元豐元年十月日涑水
司馬光君實序

開化園
Kazhwa library

開化圖書館

Kaohua library

清文因來...

同...

...

...

...

...

...

劉恕曰孔子作春秋筆削美刺子游子夏
門人之高第不能措一辭魯太史左丘明
以仲尼之言高遠難繼而爲之作傳後之
君子不敢紹續焉惟陸長源唐春秋尹洙
五代春秋非聖人而作經猶春秋吳楚之
君僭號稱王誅絕之罪也左氏傳據魯史
因諸侯國書繫年敘事春秋所貶損大人
當世君臣有威權勢力其事實皆形於傳

通鑑外紀百
一
故隱其書而不宣以免時難後漢獻帝以
班固漢書文繁難省命荀悅依左傳體爲
漢紀言約事詳大行於世晉太康初汲郡
人發魏襄王家得紀年文意大似春秋其
所記事多與左氏符同諸儒乃知古史記
之正法自是袁宏張璠孫盛干寶習鑿齒
以下爲編年之書至唐五代其流不廢漢
晉起居注梁唐實錄皆其遺制也國語亦

左丘明所著載內傳遺事或言論差殊而
文詞富美爲書別行自周穆王盡晉知伯
趙襄子當貞定王時凡五百餘年雖事不
連屬於史官蓋有補焉七國有戰國策晉
孔衍作春秋後語竝時分國其後絕不錄
焉唐柳宗元采摭片言之失以爲誣淫不
槩於聖作非國語六十七篇其說雖存然
不能爲國語輕重也司馬遷始撰本紀年

表八書世家列傳之目史臣相續謂之正
史本朝去古益遠書益煩雜學者牽於屬
文專尚西漢書博覽者乃及史記東漢書
而近代士頗知唐書自三國至隋下逮五
代懵然莫識承平日久人愈怠惰莊子文
簡而義明玄言虛誕而似理功省易習陋
儒莫不尚之史學澆微矣案歷代國史其
流出於春秋劉歆敘七略王儉撰七志史

記以下皆附春秋荀勗分四部史記舊事
入丙部阮孝緒七錄記傳錄紀史傳由是
經與史分夫今之所以知古後之所以知
今因善惡以明褒貶察政治以見興衰春
秋之法也使孔子贊易而不作春秋則後
世以史書爲記事瑣雜之語春秋列於六
藝愚者莫敢異說而終不能曉也恕皇祐
初舉進士試於禮部爲司馬公門生侍於

大儒得聞餘論嘉祐中公嘗謂恕曰春秋
之後迄今千餘年史記至五代史一千五
百卷諸生歷年莫能竟其篇第畢世不暇
舉其大略狀煩趨易行將泯絕予欲託始
於周威烈王命韓魏趙爲諸侯下訖五代
因丘明編年之體倣荀悅簡要之文網羅
衆說成一家書恕曰司馬遷以良史之才
叙皇帝至秦漢興亾治亂班固已下世各

名家李延壽總八朝爲南北史而言詞卑
弱義例煩雜書無表志沿革不完梁武帝
通史唐姚康復統史世近亾軼不足稱也
公欲以文章論議成歷世大典高勳美德
褒贊流於萬世元凶宿姦貶絀甚於誅殛
上可繼仲尼之經丘明之傳司馬遷安可
比擬荀悅何足道哉治平三年公以學士
爲英宗皇帝侍講受詔修歷代君臣事迹

通鑑外紀
恕蒙辟寘史局嘗請於公曰公之書不始於上古或堯舜何也公曰周平王以來事包春秋孔子之經不可損益曰曷不始於獲麟之歲曰經不可續也恕乃知賢人著書尊避聖人也如是儒者可以法矣熙寧三年冬公出守京兆明年春移帥潁川固辭不行退居洛陽恕褊狷好議論不敢居京師請歸江東養親公以新書未成不廢

刊削怨亦遙隸局中嘗思司馬遷史記始
於黃帝而包犧神農闕漏不錄公爲歷代
書而不及周威烈王之前學者考古當閱
小說取舍乖異莫知適從若魯隱之後止
據左氏國語史記諸子而增損不及春秋
則無與於聖人之經包犧至未命三晉爲
諸侯比於後事百無一二可爲前紀本朝
一祖四宗一百八年可請實錄國史於朝

廷爲後紀管何承天樂資作春秋前後傳
亦其比也將俟書成請於公而爲之熙寧
九年恕罹家禍悲哀憤鬱遂中癱痺右肢
旣廢凡欲執筆口授稚子羲仲書之常自
念平生事業無一成就史局十年俛仰竊
祿因取諸書以國語爲本編通鑑前紀家
貧書籍不具南徼僻陋士人家不藏書臥
病六百日無一人語及文史昏亂邊忘煩

簡不當遠方不可得國書絕意於後紀乃
夏前紀曰外紀如國語稱春秋外傳之義
也自周共和元年庚申至威烈王二十二
年丁丑四百三十八年見於外紀自威烈
王二十三年戊寅至周顯德六年己未一
千三百六十二年載於通鑑然後一千八
百年之興廢大事坦然可明管李弘基用
心過苦積年疾而藥石不繼盧昇之手足

孿廢著五悲而自沈潁水予病眼病創不
寐不食才名不逮二子而疾疹艱苦過之
陶潛豫爲祭文杜牧自撰墓誌夜臺甫邇
歸心若飛聊敘不能作前後紀而爲外紀
焉佗日書成公爲前後紀則可刪削外紀
之煩冗而爲前紀以備古今一家之言恕
雖不及見亦平生之志也

資治通鑑外紀卷第一

宋 京兆萬年劉 恕 編集

包犧以來紀

包犧氏

包犧氏

蛇首人身 母曰華胥

風姓生於成紀

上古至周厲王無年可紀而皇甫謐

諸儒所紀皆有年衆說差玄不同及疑事異端備列於注以示傳聞異辭

象日月之明謂

之太昊取犧牲以充包厨號包犧後世音謬謂之伏

犧或謂之處犧一號皇雄氏

或作黃熊都陳

元年辛巳 或云甲寅上

古之時人民無別羣物不殊未有三綱六紀衣食器用之利民人但知其母不知其父臥則哇哇起則吁

吁飢則求食飽即棄餘茹毛飲血而衣皮革伏犧德
合上下天應以鳥獸文章地應以河圖洛書則而象
之仰觀象於天俯觀法於地中觀萬物之宜造八卦
始作三畫以象二十四氣因而重之爻象備矣筮之
紀陽氣之初以為律法建五氣立五常定五行始名
官而以龍紀有甲曆五運象法乾坤以正君臣父子
夫婦之義繼天而王為百王先度時制宜作為罔罟
以佃以漁以贍民用制嫁娶以儷皮為禮於是人民
乃治君親以尊臣子以順羣生和洽各安其性在位
一十年或云一百一十六年至周任宿須句顓臾四
國皆風姓司太昊有濟之祀昔者天地未分謂之太

易元氣始萌謂之太初氣形始端謂之太始形變有質謂之太素質形已具謂之太極亦曰渾沌五氣通運二靈體散為天地之元故離為清濁清以陽發故氣冲為天濁以陰凝故氣下為地天地形別謂之二儀以人參之

謂之三才

開闢至獲麟二百七十六萬歲分為十紀大率一紀

二十七萬六千年或曰二十六萬七千年十紀者

九頭紀一也時有臣無官位尊卑之別

五龍紀二也或云五姓紀二十七萬三千六百年是

為五龍一云七萬三千六百年

攝提紀三也或云七十七姓紀六百一十四萬九千

五百二十年是為攝提或云括提一云六十四萬九

千五百二十年是為攝提

合洛紀四也或云三姓紀六千四十年是為合洛一

云六千三十年

連通紀五也或云六姓紀三萬二千年是為連通

序命紀六也或云四姓紀四萬年是為序命亦云述

紀鄭玄六藝論曰遂皇之後歷六紀九十一代至伏

犧始作十二言之教方叔機注曰九頭紀一五龍紀

道益十言二

五攝提紀七十一或云二合洛紀三連通紀六序命紀四凡

九十一代也或云一百八十七代

因提紀八也

禪通紀九也

流訖紀十也或云疏訖

天地渾沌如雞子盤古天

關陽清為天陰濁為地盤古

天聖於地天日高一丈地日厚一丈盤古日長一丈

如聖於地天日高一丈地日厚一丈盤古日長一丈

生此萬八千歲天數極高地數極深盤古極長然則

目為日月脂膏為江海毛髮為艸木先儒說盤古泣

漢間俗說盤古頭為東岳腹為中岳左臂為南岳右

也後乃有三皇數起於一立於三成於五盛於七處

於九故天去地九萬里

天皇氏天地初立元氣肇始歲起攝提有神人一身

十二頭號曰天靈或云一姓十二人頭即人也古語

質如今人數魚鳥以頭計之被跡在西北柱州崑崙
山下一作括州治一萬八千歲易緯通卦驗曰天皇
之先與乾曜合元天地成位君臣道生君有五期輔
有三名注云君之用事五行王亦有五期輔有三名
公卿大夫也

地皇氏代天皇一姓十一頭興於熊耳龍門山定星
辰分晝夜以三十日為月十一月為冬至治一千年
或云八千年或云一萬一千年

人皇氏代地皇九頭兄弟九人生於刑馬山出於堤
地之口依山川土地之勢財度為九州謂之九圍各
居其一而為之長人皇居中州以制八輔駕六羽乘

雲車使風雨兄弟各三百歲或云各一百歲
十六代合四萬五千六百年謂之九頭紀或云兄弟
各一百六十大代一云天皇地皇人皇兄弟九人分長

天下
有巢氏上古穴處人民不勝禽獸蟲蛇有聖人教之
構木為巢以避羣害食艸木實號大巢氏治石樓山

南有天下百餘年或云百餘代
燧人氏民食果蔬蚌蛤腥臊臭惡傷害腹胃而多疾
病有聖人作上觀星辰下察五木鑽木取火炮生為

孰養人利性避臭去惡遂天之意有天下百餘代八
 萬年或云一萬二千年通卦驗曰遂皇始出握後矩
 表計寘注云遂皇謂遂人在伏犧前始王天下矩法
 也言遂皇持斗機運轉之法指天以施政教六藝論
 曰易者陰陽之象天地之所變化政教之所生自人
 皇初起人皇即遂皇也譙周古史考曰有聖人以火
 德王號燧人燧人次有三姓乃至伏犧皇南謚帝王世
 曰燧人氏沒包犧氏代之自天皇至燧皇九十一代
 一曰燧人氏沒包犧氏代之自天皇至燧皇九十一代
 包犧氏沒女媧氏代立號女帝是為女皇元年辛未
 風姓蛇身人首作笙簧張雲幕而枚占神明往古之
 時四極廢九州裂天不兼覆地不周載火熾炎而不
 滅水浩洋而不息猛獸食精民驚鳥攬老弱於是不
 媧鍊五色石以補蒼天斷鼈足以立四極殺黑龍以
 濟冀川積蘆灰以止淫水天不足西北故日月移焉
 地不足東南故百川注焉蒼天不足西北故日月移焉
 川平狡蟲死精民生承包犧制度無所革造在位一
 百三十年
 大庭氏
 柏皇氏

開

中央氏

栗陸氏

驪連氏

赫胥氏

尊盧氏

混沌氏

皞英氏

有巢氏

朱襄氏

實不氏

葛天氏

二曰玄鳥

曰達帝功

非人皇之後有巢氏
 治天下也多風而陽氣畜積萬物散解果
 士達作為五弦瑟以來陰氣以定羣生
 樂三人慘牛尾投足以歌八闋一曰載民
 鳥三曰遂草木四曰奮五穀五曰敬天常六
 功七曰依地德八曰總萬物之極
 自伏犧至無懷一千二百六十年或云五萬
 百八十二年女媧至無懷十五君龔包犧氏
 一千一百五十年或云一萬七千七百八十
 萬六千八百八十年宋均曰女媧至神農七
 日伏犧次有三姓始至女媧後五
 十姓至神農

通鑑什七卷一

包犧氏

四

書庫 library

共工氏在包犧後任知刑以疆伯九域而不王以水
 紀官雖有水德在火木之閒非其序也周語曰昔共
 工虞于湛樂淫失其身欲壅防百川墮高堙庫以害
 天下皇天弗福庶民弗助禍亂並興共工用滅賈逵
 曰共工諸侯炎帝之後姜姓顓頊氏襄共工氏侵陵
 諸侯與高辛氏爭而王歸藏啓筮曰共工人面蛇身
 朱髮文子曰共工為水害故顓頊誅之淮南子曰昔
 共工之力觸不周之山使地東南傾與高辛爭而帝
 遂潛于淵宗族殘滅繼嗣絕祀又曰舜時共工振滔
 洪水以薄空桑荀卿子曰禹伐共工六韜曰共工氏
 自賢以為無可臣者久空大官天下曰亂民無所附
 而亡韓詩外傳曰古封太山禪梁甫者萬餘人仲尼
 觀焉不能盡識管子曰封太山禪梁父者七十九代之君俱
 王天下封禪書曰封太山禪梁父者七十九代之君俱
 所識十二而已無懷氏乃至伏犧神農列子楊朱曰
 伏犧已來三十餘萬歲莊子胠篋曰容成氏大庭氏
 伯皇氏中央氏栗陸氏驪畜氏軒轅氏赫胥氏尊盧
 氏祝融氏伏戲氏神農氏六韜大明曰相皇氏栗陸
 氏黎連氏軒轅氏共工氏宗盧氏祝融氏庸成氏混
 沌氏昊英氏有巢氏朱襄氏葛天氏陰康氏無懷氏

金樓子與王曰容成氏大庭氏柏皇氏中央氏栗陸氏驪連氏赫蘇氏宗盧氏祝和氏鵬冠子稱成鳩氏秦丞相綰等曰古有天皇有地皇有泰皇最貴孔衍春秋後語泰皇作人皇董仲舒春秋繁露曰推神農以為九皇史記曰九皇氏沒六十四氏與六十四氏沒三皇興張晏曰三皇之前有人皇九首韋昭曰上古有人皇者九人即九皇也淮南子曰太古二皇尚書中侯義明曰洞五九禮闕郵注云闕止郵過言五帝後洞三王之世其治各九百歲當以禮止過也諸儒各稱上古名號年代世遠書亡其存者參差乖背且復煩而無用今並略之粗舉一二可以見古今衆說誕妄不同

神農氏

神農氏姜姓

人身牛首母曰任巳有蟠氏女名曰女登少典之正妃

長於姜水

以火承木故為炎帝

元年巳巳或云辛丑壬午

古者民茹艸飲水

采樹木之實食羸蛇之肉多疾病毒傷之害神農以
 為人民眾多禽獸難以久養乃求可食之物相土地
 燥溼肥瘠高下因天之時分地之利教民播種五穀
 周書曰神農之時天雨粟神農耕而種之作陶冶斤斧為耒耜鋤耨以墾
 艸莽然後五穀興以助果蓏實而食之又嘗百草酸
 鹹之味察水泉之甘苦令民知所避就當此之時一
 日而遇七十毒神而化之使民宜之天下號曰神農
 本起烈山稱烈山氏一曰連山氏伊耆氏大庭氏魁
 隗氏非包犧之後大庭氏禮記明堂位曰土鼓蕢桴
 葦籥伊耆氏之樂也郊特牲曰伊耆氏始為蜡
 鄭玄曰伊耆氏古天子有天下之號詩譜曰大庭軒
 轅逮於高辛皇侃曰神農伊耆一代總號其子孫為

天子者始為蜡祭熊安生曰伊耆氏即神農也案易
神農始作耒耜或云大庭神農之別號則伊耆神農
與大庭為都魯以火紀官其俗樸重端慤不忿爭而
一人也

財足無制令而人從威厲而不殺法省而不煩列鄜
於國日中為市以聚貨帛國實民富而教化成削桐
為琴繩絲為弦以通神明之德合天人之和諸侯風
沙氏叛不用命箕文諫而殺之神農退而修德夙沙
之民自攻其君而來歸其地南至交趾北至幽都東
至湯谷西至三危莫不聽從

在位一百二十年或云一百四十年神農納莽

水氏女曰聽

談生臨魁

帝臨魁元年辛巳在位六十年或云八十年

帝承元年辛巳在位六年或云六十年一本承在臨

通鑑

神農氏

六

魁先

帝明元年丁亥在位四十九年

帝直元年丙子在位四十五年

帝釐一日克元年辛酉在位四十八年

帝哀元年巳酉在位四十三年

帝榆罔元年壬辰在位五十五年自神農至榆罔四

百二十六年臨魁至榆罔七帝襲神農氏之薨三百

六年春秋緯命歷序曰炎帝傳八世五百二十歲或

云三百八十年呂氏春秋曰神農有天下十

七世譙周曰神農至炎帝一百三十三姓

黃帝

黃帝有熊國君少典之子姓公孫名軒轅

母曰附寶其先即炎

帝母家有嬌氏之女孕軒轅二十四月而生於壽丘

長於姬水改姓姬神農氏世衰諸侯相侵伐暴虐百

姓而弗能征軒轅習用干戈以征不享諸侯咸來賓

從蚩尤最爲暴莫能伐炎帝欲侵陵諸侯諸侯咸歸
軒轅軒轅修德振兵治五氣藝五種撫萬民度四方
教熊羆貔貅羆虎與炎帝戰於阪泉之野三戰然後
得志蚩尤作亂不用命軒轅徵師與蚩尤戰于涿鹿
之野蚩尤爲大霧軍士昏迷軒轅作指南車以示四
方遂禽蚩尤戮於中冀名其地曰絕轡之野

應劭曰蚩尤古

天子鄭玄曰蚩尤伯天下尚書呂刑曰蚩尤惟始作
亂延及於平民孔安國曰九黎之君號曰蚩尤孔子
三朝記曰蚩尤庶人之貪者韋昭曰九黎氏九人蚩
尤之徒也周書嘗麥曰赤帝分正二卿命蚩尤臨四
方司百工蚩尤乃逐帝于涿鹿之阿赤帝大懼說于
黃帝執蚩尤殺之于中冀山海大荒北經曰蚩尤作
兵伐黃帝帝命應龍攻於冀川之野應龍蓄水蚩尤
請風伯雨師作大風雨黃帝下天女曰魃雨止遂殺

蚩尤管子曰葛盧之山發而出金蚩尤以為劍鎧矛
 戟河圖曰蚩尤兄弟八十一人並獸身人語食沙石
 作兵杖刀戟大弩威振天下誅殺無道天授軒轅神
 符伏蚩尤王兵以制八方蚩尤沒後天下擾亂軒轅
 畫蚩尤形象以威海內眾謂蚩尤不歿萬邦弭伏或
 云蚩尤兄弟七十二人食鐵石軒轅誅之秦漢間說
 蚩尤氏耳鬢如劍戟頭有角與諸侯咸尊軒轅代神
 軒轅鬪以角觝人不能向

農氏為天子元年丁亥或云巳丑辛丑丙子是為黃帝黃者中和美

色帝始制法度萬世不易有土德之瑞故天下以為

號一曰軒轅氏三統曆曰有軒冕之有熊氏皇甫謐

古有熊國黃帝之所都受國於有熊帝鴻氏歸藏氏

居軒轅之丘故因以為名又以為號內行刀鋸外用甲兵制陳法設五旗五麾天下不順

者從而征之東至于海西至于空桐南至于江北逐

深以

葷粥而邑于涿鹿之阿遷徙無常處以師兵為營衛

成命百物以明民共財受地形象天文以雲紀官舉

風后力牧太山稽常先大鴻得六相而天地治神明

至風后明乎天道故為當時風后或作蚩尤軒轅本紀曰黃帝舉風后為相

力牧為將太常察乎地利故為稟者奢龍辨乎東方故為

土師祝融辨乎南方故為司徒大封辨乎西方故為

司馬后土辨乎北方故為李史官蒼頡造文字崔瑗曹植

蔡邕索靜曰蒼頡古之王者張揖曰蒼頡為帝王生於禪通紀慎到曰在包犧前衛氏曰在包犧蒼帝之

世譙周曰在炎帝世徐整曰在神農黃帝受河圖見帝之間或云蒼頡作書天雨粟鬼夜哭

日月星辰之象始有星官之書其師大撓探五行之

情占斗剛所建始作甲子甲乙謂之幹子丑謂之枝
枝幹相配以名日命容成造曆隸首作數伶倫自大
夏之西阮險之陰取竹於嶰谿之谷以生空竅厚鈞
者斷兩節閉長三寸九分而吹之以爲黃鍾之宮制
十二筒以聽鳳凰之鳴而別十二律其雄鳴爲六雌
鳴亦六以比黃鍾之宮生六律六呂候氣之應以立
宮商之聲治陰陽之氣節四時之度推律曆之數起
消息正閏餘作五聲以正五鍾五官以正人位又命
伶倫與榮叅鑄十二鍾以和五音以仲春之月乙卯
之日日在奎始奏之命曰咸池作冕垂旒充纁爲衣

玄裳黃旁觀翬翟州木之華乃染五色爲文章以表
貴賤作舟車以濟不通旁行天下方制萬里畫壘分
州得百里之國萬區以分星次經土設井以塞諍端
立步制畝以防不足使八家爲井井開四道而分八
宅鑿井於中一則不洩地氣二則無費一家三則同
風俗四則齊巧拙五則通財貨六則存亡更守七則
出入相司八則嫁娶相媒九則無有相貸十則疾病
相救是以情性可得而親生產可得而均欺陵之路
塞鬪訟之心弭井一爲鄰鄰三爲朋朋三爲里里五
爲邑邑十爲都都十爲師師十爲州分之於井而計

於州則地著而數詳人民不夭百官無私市不預賈
 城郭不閉邑無盜賊相讓以財風雨時五穀登虎豹
 不妄噬鷲鳥不妄搏遠夷之國莫不獻其貢職黃帝
 之子二十五宗其四母之子得姓者十四人別為十
 二姓姬酉祁已滕箴任荀僖姁依二人為姬二人
 為已正妃西陵之女曰嫫祖生二子一曰玄跽是為
 青陽名摯或云青陽母曰女節 帝考德曰少皞曰
 二曰昌意居若水為諸侯娶蜀山氏女曰昌僕謂之
 生顓頊於若水黃帝崩葬橋山在位一百年或云一
 百一十年或傳以為

仙或言壽
 三百歲

開

宣
五

少皞青陽居江水邑于窮桑天下號曰窮桑帝一曰
 帝宣元年丁卯或云巳巳乙丑以金德王號金天氏
 能修太皞之法故曰少皞或云金天國號少皞身號
 以鳥紀官都曲阜別為巳姓之祖昌意子顓頊十年
 而佐少皞十三年而冠少皞在位八十四年崩年一
 歲或云在位百年葬雲陽命歷序曰少皞傳八世五
 百年或云十世四百年辛卯或云癸卯癸巳都衛故
 顓頊二十登帝位元年辛卯或云癸卯者專也顓頊者正
 為帝丘後徙高陽稱高陽氏或云顓頊者專也顓頊者正
 也神專正天人之道故稱之尚赤薦王以赤繒古者
 民神異業少皞之衰九黎亂德民神雜糅不可方物
 夫神作享家為巫史無有要質民匱于祀而不知其
 福蒸享無度民神不同位民瀆齊盟無有嚴威神狎民
 則不蠲其為嘉生不降無物以享既災薦臻莫盡其
 氣顓頊受之乃命南正重司天以屬神火正黎司地
 以屬民使復舊常無相侵瀆顓頊作曆以孟春為元
 是時正月朔旦立春五星會于天歷營室也冰凍始
 泮蟄蟲始發雞始三號天曰作時地曰作昌人曰作
 樂鳥獸萬物莫不應和故顓頊聖人為歷宗也北至
 幽陵南至交阯西至流沙東至蟠木莫不砥屬顓頊

幽陵南至交阯西至流沙東至蟠木莫不砥屬顓頊
 黃帝
 十

之法婦人不辟男子於路者拂之四達之衢飛龍作
 效八風之音命曰承雲以祭上帝令鱣先為樂倡鱣
 乃偃浸以其尾鼓其腹其音英少皞孫嶠極之子曰
 學生而神靈自言其名年十五佐顓頊顓頊在位七
 十年八年崩年九十歲或云九十一歲或云八世五百四十八
 年曰顓頊傳九世三百五十年或云八世五百四十八
 帝嚳三十登帝位元年巳酉或云辛亥辛巳號高辛
 氏少皞之前天下之號象其德百官之號象其徵顓
 頊以來天下之號因其地百官之號因其事高陽高
 辛皆所興之地名顓頊與嚳皆以字為號上古質故
 也或云高辛非地名顓頊與嚳皆以字為號上古質故
 帝之身號高陽高辛皆國氏土地之號或云嚳項帝嚳為
 也言能窮極道德序三辰以固民都亳尚黑薦玉以
 黑繒命咸黑為聲歌九招六列六英倕作鼗鼓鐘磬
 吹苓管壘箎令鳳鳥天翟舞之以康帝德帝嚳納四
 妃元妃有邠氏女曰姜原生奔次妃有娥氏女曰簡
 狄生契次妃陳鋒氏女曰慶都孕十四月生堯於丹
 陵次妃妣訾氏女曰常儀生摯昔顓頊生稱稱生卷
 章卷章生重黎為嚳火正淳耀敦大天明地德光照

四海以生柔嘉材故命曰祝融共工氏作亂嚳使重
黎誅之而不盡帝以庚寅日誅重黎而以其弟吳回
為重黎後復居火正為祝融嚳在位七十五年崩或
云六十三年年一火正為祝融嚳在位七十五年崩或
二歲葬宜陽或云濮陽命歷序曰嚳傳十世四百年
案左氏傳少皞氏有子曰重顓頊氏有子曰黎重黎
二人各出一帝而司馬遷并以重黎為楚國祖又以
重黎為官號而吳回為之故東晉譏遷并兩人而為
一以無為有謂此也
帝摯元年巳未在位九年不善崩或云荒淫無法度
不修善政見廢摯少皞曾孫同名未詳自黃帝至帝
摯三百四十年少皞至帝摯四君二百四十年
命歷序曰黃帝傳十世一千五百二十年或云
十八代尚書緯曰孔子得黃帝玄孫帝魁之書

帝堯

帝堯帝嚳之子年十五長十尺佐兄摯受封唐侯姓

伊祁

元年戊辰或寅辛卯

號陶唐氏都平陽

鄭玄詩譜曰唐帝堯舊都之地

今日太原晉陽堯始居此後遷河東平陽皇甫謐曰堯始封於唐今中山唐縣也後徙晉陽及為天子都平陽漢書音義曰唐今河東永安去晉四百里即魏也尚白薦玉以白繒茅茨

不翦樸桷不斲素題不斲大路不畫越席不緣大羹不和粢食不穀藜藿之羹飯於土簋飲於土鋤金銀珠玉不飾錦繡文綺不展奇怪異物不視玩好之器不寶淫泆之樂不聽宮垣室屋不堊色布衣揜形鹿裘御寒衣履不敝盡不更為也不以私曲之故害耕稼之時吏忠正奉法者尊其位廉貞平絜愛民者厚其祿民有孝慈力耕桑者遣使表其閭正法度禁詐偽存養孤寡賑亡甌之家自奉甚薄賦役甚寡巡狩

行教周流五嶽西教沃民東至黑齒存心於天下加
志於窮民一民飢則曰我飢之也一人寒則曰我寒
之也一民有罪曰我陷之也百姓戴之如日月親之
如父母仁昭而義立德博而化廣故不賞而民勸不
罰而民治先恕而後教單均刑法以儀民是時十日
並出焦禾稼殺艸木而民無所食契獫狁鑿齒九嬰大
風封豨修蛇皆爲民害堯乃使羿誅鑿齒於疇華之
野殺九嬰於凶水之上繳大風於青丘之澤上射十
日下殺契獫狁斷修蛇於洞庭禽封豨於桑林萬民皆
喜天下廣狹險易遠近始有道里三苗復九黎之德

堯征而克之于丹水之浦以服南蠻育重黎之後不
忘舊者使復典之是爲羲氏和氏至于夏商周重黎
氏世敘天地而別其分主於是龍門未開呂梁未發
河出孟門江淮通流四海溟滓無有平原高阜盡皆
滅之名曰鴻水民上丘陵赴樹木陰多滯伏而湛積
水道壅塞不行其原民氣鬱闕而滯著筋骨瑟縮而
不達堯作爲舞以宣導之堯求能治水者羣臣四岳
皆曰鯀可帝曰方命圯族岳曰等之未有賢于鯀者
願帝試之乃用鯀治水鯀顓頊五世孫

史記及帝王
世紀顓頊生
世紀顓頊生
史記及帝王
世紀顓頊生

鯀三統歷顓頊五世生鯀杜預曰鯀則舜之五世從
祖父也而及舜共爲堯臣堯則舜之三從高祖而妻

其女此史記之可疑也

堯封為崇伯鯀生禹於石細長於西羌

長九尺二寸

禹字高密母有莘氏女曰志是為修巳

堯娶散宜氏女曰

女皇生朱不肖堯在位七十年求巽位四岳薦舜昔

顓頊生窮蟬窮蟬生敬康敬康生句芒句芒生嶠牛

嶠牛生瞽叟瞽叟生舜於姚墟姓姚

字都君母曰握登

母死

後母生象父母及象皆下愚不移瞽叟愛後妻子常

欲殺舜舜順事父母與弟日以篤謹出田則號泣年

五十猶嬰兒慕好學孝及寬裕溫良耕於歷山葦年

而田者爭處堯堯以封壤肥饒相讓漁於雷澤漁者

爭處湍瀨以曲隈深潭相予陶於河濱河濱器不苦

通鑑外紀卷之二 堯紀
三
窳作什器於壽丘就時於負夏一年所居成聚二年
成邑三年成都二十以孝聞三十堯聞其賢徵之艸
茅之中與之語禮樂而不逆道廣大而不窮堯妻二
女以觀其內任之百官以觀其外封於虞爲諸侯昔
高陽氏有才子八人天下謂之八凱高辛氏有才子
八人天下謂之八元世濟其美堯不能舉舜舉八凱
至后土八元布五教于四方三載考績堯知舜足授
天下以爲授舜則天下得其利而丹朱病授丹朱則
天下病而丹朱得其利堯曰終不以天下之病而利
一人卒授舜使攝行天子事舜受終于文祖鯀播其

淫心稱遂共工之過治水九年鄣洪水而不息功用
不成舜巡狩四岳流共工放驩兜竄三苗殛鯀四罪
而天下咸服或云帝鴻氏少皞氏顓頊氏縉雲氏皆
有不才子曰渾敦窮奇檮杌饕餮堯不能去舜投諸
四裔以禦魍魅卽四罪也帝乃舉禹使續鯀之業鯀

殛于羽山以歿鯀作九仞之城或云禹作城郭呂氏春秋

曰堯以天下讓舜鯀怒曰得天之道者為帝得地之道者為三公怒甚猛獸欲為亂比獸之角能以為城舉其尾能以為旌召之不來彷徨於野以患帝舜於是殛之於羽山禹不敢怨而反事之官為司空以通水潦顏色黧黑步不相過竅氣不通以中帝心韓子曰堯欲傳天下於舜鯀諫曰不祥哉孰以天下而傳之匹夫堯不聽舉兵殺鯀於羽山之郊共工又諫堯又舉兵而誅之於幽都於是天

通鑑外紀卷二 堯紀
下莫敢言無傳天下於舜仲尼曰堯知舜賢非其
難也不以所疑敗其所察至乎誅諫者乃其難也

劉恕曰八凱八元堯之諸父昆弟四凶之罪著於
海內堯知舜於側微天下未盡厭服遺之大功二
十使民臣仰其功業而鄭玄以堯之末年四凶在
朝爲亢龍有悔烏足以知聖人哉

禹爲人敏給克勤其德不違其仁可親其言可信聲
爲律身爲度見耕者五耦而式過十室之邑則下爲
秉德之士存焉與益稷命諸侯百姓興人徒以傳土
行山表木定高山大川禹傷先人功之不成念前之
非度釐改制量象物天地比類百則儀之于民而度

之于羣生共工從孫四岳佐之禹勞身焦思居外十
三年過家門不敢入陸行載車水行載舟泥行蹈橈
山行則楫身執耒耜以爲民先股無胈脛無毛手足
胼胝支體偏枯高高下下疏川導滯鍾水豐物封崇
九山決汨九州陂鄣九澤豐殖九藪汨越九原宅居
九隩合通四海品處庶類以爲河所從來者高水湍
悍難以行平地數爲敗迺醜二渠以引其河北載之
高地至大陸播爲九河滄濟漯決江漢排淮泗而注
之海鑿龍門闢伊闕析底柱破碣石通九派疏五湖
濬四瀆鴻水漏中州乾百川順流蛇龍潛處各歸其

所民得去高險處平土皆寧其性故天無伏陰地無散陽水無沈氣火無災燁神無閒行民無淫心時無逆數物無害生禹常稱人無食則不能使也不利於人則不能勸也民勞而不怨苦者利歸於人也人有無檀賣子者禹以歷山之金鑄幣贖之令益于衆庶稻可種卑溼命稷于衆庶難得之食食少調有餘相給以均諸侯禹乃行相地宜所有以貢及山川之便利復舊制爲九州行自冀州始制土田各因所生遠近賦入貢棊楙遷有無萬國作乂禹使大章步自東極至于西垂二億三萬三千五百里七十一步又使

暨亥步南極盡於北垂二億三萬三千五百里七十
五步四海之內東西二萬八千里南北二萬六千里
帝錫禹玄圭以告成功天下於是平治稷帝嚳子棄
也爲兒時忤如巨人之志其遊戲好種樹麻菽麻菽
美及爲成人遂好耕農地之宜穀者稼穡焉民皆法
則之堯舉爲農師民得其利命夔效山林谿谷之音
夔或作質以歌以麋鞞置缶而鼓之拊石擊石以象上帝
玉磬之音以致舞獸拌五弦之瑟爲十五弦命曰大
章以祭上帝而天下大和堯有子十人辟位二十八
年凡在位百年而崩舜卽天子位

論法翼善傳聖曰堯周書論法周公

所作檀弓曰歿諡周道也而堯舜禹湯桀紂得有諡者因上世之生號追之為歿諡上世質非至善至惡無號故佗君無諡也白虎通曰堯猶巍巍至高之貌清妙高遠優游博行百王之長也孔安國曰堯年十六升為天子七十載求禪試舜三載自正月上日至崩二十八載堯凡壽百一十七歲王肅曰歷試三載其一在徵用之年其餘二載與攝位二十八年凡三十歲孔穎達曰堯一百一十六歲言七誤也皇甫謐曰堯以甲申歲生甲辰即位甲午徵舜甲寅舜代行天下事辛巳崩年百一十八在位九十八年堯葬穀林鄭玄曰堯游成陽而歿葬焉

帝舜

帝舜即位之明年正月元日格于文祖元年戊申本處虞

之媯汭天下號曰有虞氏都蒲坂皇甫謐曰舜都或言蒲坂或言平陽

或言潘潘今上谷也尚赤其社用土封堯子朱處丹淵為諸侯

以奉先祀服其服禮樂如之謂之虞賓天子弗臣示
不敢專也舜載天子旗往朝瞽叟夔夔惟謹如子道
封弟象於有庠為諸侯不得有為於其國天子使吏
治其民而納其貢稅故謂之放韓子曰瞽叟為父而舜放之象為弟而舜
殺之舜廣開視聽求賢人以自輔作五明扇立誹謗木
恭已無為彈五弦之琴歌南風之詩曰南風之薰兮
可以解吾民之愠兮南風之時兮可以阜吾民之財
兮帥象禹之功度之于軌儀莫非嘉績克厭帝心舜
美禹能以德修舜之功以為司空賜姓曰妣封為夏
伯氏曰有夏謂之伯禹天下宗之謂之大禹祚四嶽

國命以侯伯賜姓曰姜氏曰有呂謂其能為禹股肱

心膂以養物豐民人封於申呂即伯夷也禹曰非予

能成亦大費為輔舜曰咨爾費贊禹功其賜爾皐游

爾後嗣將大出乃妻之姚姓之玉女皇甫謐曰賜之

之大費拜受佐舜能議百物調馴鳥獸而知其言是

為栢翳舜賜姓羸鄭語曰羸栢翳之後漢地理志曰

養艸木鳥獸賜姓羸則栢翳伯益乃一人聲轉故字

異也列女傳曰皐子生五歲而佐禹曹大家注云皐

子皐陶之子伯益也中候苗興曰皐陶之苗為秦史

記音義曰大業是皐陶大費是伯益一名栢翳案史

記歷敘舜禹名臣之後云栢翳之後為秦有本紀垂

益夔龍其後不知所封則秦之先栢翳非伯益也尚

書皐陶益同佐堯舜禹而先顓頊之裔孫曰女脩生

同

子大業大業取少典之子曰女華生大費大費生子
二人一曰大廉實鳥谷氏二曰若木實費氏其子孫
或在中國或在夷狄舜以樂教天下重黎舉夔舜以
爲樂正命延益八弦爲二十三弦之瑟夔修九招六
列六英以明帝德於是正六律和五聲以通八風而
天下大服重黎欲益求人舜曰樂天地之精得失之
節夔能和之以平天下一而足矣棄及契益伯夷皆
佐禹平水土有功舜以棄爲后稷契爲司徒益作虞
伯夷作秩宗臯陶作士垂作共工夔典樂教胄子龍
作納言四岳十二牧咸成厥功唯禹之功爲大四海

之內咸戴舜之明德禹既興九韶之樂致異物天下
 宗禹之明度數聲樂為山川神主禹當朝廷嘗曰吾
 不恐四海之士留於道路恐其留吾門也故士皆至
 舜以契能和合五教係于百姓封於商賜姓子棄能
 播殖百穀蔬以衣食民人封於邠賜姓姬棄勤百穀
 而山歿初舜娶堯二女曰娥皇女英女英生商均亦
 不肖帝王世紀曰舜長妃娥皇無子次妃女英生商均次妃癸比生二女霄明燭光舜子九
 人在位三十三載命禹攝行天子事正月朔旦受命
 于神宗帥百官若帝之初於時俊乂百工相和而歌
 卿雲帝倡之曰卿雲爛兮禮縵縵兮日月光華旦復

且今人伯稽首曰明明上天爛然星陳日月光華弘
于一人帝乃再歌擁旋持衡枕首而笑曰時哉夫天
下非一人之天下也亦見乎鐘石等瑟乃及鳥獸莫
不闢情歸意焉日月有常星辰有行四時順經萬姓
允誠於予論樂配天之靈遷于賢聖莫不咸聽饗乎
鼓之軒乎舞之精華已竭褰裳去之有苗氏左洞庭
右彭蠡大山在其南北因險而不服禹欲伐之舜不
許曰吾德不厚而行武非道也乃諭教焉三年有苗
氏請服天下聞之皆非禹而歸舜之德

舜居攝之時投竄之於西裔也又云庶績咸熙分北
三苗謂舜即位後三苗復不從化分北流徙之大禹

通鑑什紀卷二 舜紀 帝舜 七

通鑑卷之九十一 夏紀一

謨云帝曰惟時有苗弗率汝祖征謂禹攝位受命詩

之鄭玄曰苗民即九黎之後顓頊誅九黎其子孫為

三國高辛之衰又復九黎之惡堯末禹攝位又三誅

之穆王深惡此族三生凶德故呂刑曰苗民弗用靈

制以刑惟作五虐之刑曰法又曰遏絕苗民無世在

下又曰苗民無辭于罰乃絕厥世吳起曰三苗氏左

洞庭右彭蠡德義不修禹滅之韋昭曰三苗炎帝之

後諸侯也堯舜之時誅討有罪廢絕其世不滅其國

立其近親紹其先祀所以有苗國歷代常存屢不從

化隨巢子汲冢紀年曰三苗將亡天雨血夏有冰地

圻及泉青龍生於廟日夜出晝日不出禹攝政十七

三苗數叛數亡未知衆異出於何時

年舜勤民事南巡狩崩於蒼梧之野禹即天子位

劉恕曰舜受堯顧託之重公天下而不私其親禹

平水土拯民昏墊而舜在位五十載功德浹於衆

心故舜巡守南裔往而不返欲北庶專意戴禹而

遠邇無俟望之意也夫堯舜之德禹之大功自生

民以來未之有也

舜生三十徵庸三十在位

孔安國曰歷試二十年攝位二十八年

五十載

陟方乃死

論法曰受禪成功曰舜猶舜舜也言能推信堯道而行

之孔安國曰舜三十徵庸三十在位服喪三年其一

在三十之數為天子五十年凡壽百一十二歲案書

稱帝乃殂落百姓如喪考妣三載四海遏密八年音言

百姓思慕堯德且明舜雖受終令天下服喪三年如

繼世之禮故於殂落下終言之下文云月正元日日舜

格于文祖謂堯崩踰年見于文祖廟而改元孟軻不

達此言以為三載服除後舜格于文祖乃妄稱孔子

曰舜既為天子又帥天下諸侯以為堯三年喪是二

天子矣若然當以服除之月至廟不當用正月元日

也踰年改元春秋常法迄今如之軻又云堯舜禹崩

三年喪畢舜禹益皆避其子然後踐位且舜正月

日受終文祖已二十八年豈容至服除未定方讓其

帝舜

帝舜

子孔安國仍軻之謬乃曰舜服堯喪三年畢將即政復至文祖廟周衰楊墨道盛孟子排而闢之可謂醇矣其於論經義談世事知謀往往短局乖戾陋儒愛其詞簡意淺雜然崇尚固可鄙笑也司馬遷云舜年三十堯舉之五十攝行天子事五十八堯崩六十一代堯踐帝位三十九年崩亦用孟軻舊說也鄭玄讀此經云舜生三十謂生三十年也徵庸三十謂歷試三十年也在位五十載陟方乃歿謂攝位至歿為五十年舜年一百歲也皇甫謐曰舜以堯之二十一年甲子生三十一年甲午徵用七十九年壬午即真百歲癸卯崩或云舜年一百歲葬於江南九疑是為零陵五歲亦云一百一十三歲

有虞氏禘黃帝而祖顓頊郊堯而宗舜幕能帥顓頊者也故報焉

劉恕曰六經惟春秋及易彖象繫辭文言說卦序卦禘卦仲尼所作詩書仲尼刊定皆不稱三皇五

帝三王易下繫曰古者包犧氏之王天下也包犧氏沒神農氏作神農氏沒黃帝堯舜氏作載繼世更王而無三五之數或以包犧至舜是爲五帝然孔子未嘗道學者不可附會臆說也書之在孔子前存於今者無幾漢藝文志周史六弢六篇惠襄之間或曰顯王時或曰孔子問焉顏師古曰卽今之六韜也今六韜周文王武王問太公兵戰之事其言鄙俚煩雜不類太公之語蓋後人依託而爲之按志兵書五十三家自吳齊孫子已下而無六弢又在儒家非兵書也顏說之妄孔穎達云六韜

後人所作好事者妄云太公非實事也班固曰禮經三百威儀三千及周之衰諸侯將踰法度惡其害已皆滅去其籍自孔子時而不具至秦大壞馬融云秦孝公已下用商君之法其政酷烈與周官相反故始皇禁挾書特疾惡欲絕滅之搜求焚燒獨悉漢武帝開獻書之路周禮出於山巖屋壁復入秘府諸儒莫得見焉孝成時劉歆挾秘書始得列序著于錄略爲衆排棄林碩以爲末世瀆亂不驗之言作十論七難以詆之何休亦謂六國陰謀之書据秦火之餘周禮最後出儒者附益固非完

本周三百六十官今乃有三百六十職冗瑣淺陋
可明其偽妄劉歆不當謂之周公致太平書而目
爲六國陰謀過矣管子亦在孔子前稱明一者皇
察道者帝通德者王謀得兵勝者霸又稱五帝三
王傳子云管仲之書過半便是後之好事所加乃
說管仲歿後事其輕重篇尤復鄙俗孔穎達曰世
有管子書或是後人所錄故知六韜稱三皇周禮
稱三皇五帝及管氏書皆雜孔子後人之語按其
歲月非本書也先秦之書存於今者周書老子曾
子董子慎子鄧析子尹文子孫子吳子尉繚子皆

不言三皇五帝三王論語墨子稱三代左氏傳國語商子孟子司馬法韓非子燕丹子稱三王穀梁傳荀卿子鬼谷子亢倉子稱五帝亢倉子又稱明皇聖帝孔穎達云穀梁傳漢初始作不見經文故多妄言陸德明云穀梁赤乃後代傳聞案漢隋唐書無亢倉子新唐書藝文志云天寶元年詔號亢桑子為洞靈真經求之不獲襄陽處士王士元謂莊子作庖桑子太史公列子作亢倉子其實一也取諸子文義類者補其亡封演云王巨源採莊子庚桑楚篇義補葺分為九篇云其先人於山中得

古本奏上之敕付學士詳議疑不實竟不施行今
允桑子三卷是也惟文子列子莊子呂氏春秋五
經緯始稱三皇鶡冠子稱九皇案文子稱墨子而
列子稱魏文侯墨子稱吳起皆周安王時人去孔
子沒百年矣藝文志鶡冠子一篇楚人居深山以
鶡爲冠唐世嘗辨此書後出非古鶡冠子今書三
卷十五篇稱劇辛似與呂不韋皆秦始皇時人其
文淺意陋非七國時書藝文志云文子老子弟子
孔子並時非也莊子又在列子後與文列皆寓言
誕妄不可爲據秦漢學者宗其文詞富美論議辯

博故競稱三皇五帝而不究古無其人仲尼未嘗
道也漢夏侯勝眭孟之徒以道術立名其所述著
無識一言劉向父子按定九流亦無識錄故知識
緯起於哀平間假託鬼神妄稱祥瑞王莽好符命
光武以圖讖興俗儒趨時其學遂盛乃云孔子既
敘六經恐後世不能稽同其意別立緯讖而春秋
元命包稱公輸班墨翟又言益州案班翟在仲尼
之後漢武帝始置益州春秋讖云堯使共工理水
詩讖云蚩尤敗然後堯受命前後顛倒咸與經傳
不合故名儒以爲祆妄亂中庸之典司馬遷孔安

國皆仕漢武帝遷據穀梁傳荀卿子等稱五帝不敢信文列莊子呂氏春秋稱三皇見百家言黃帝左氏傳言高陽高辛氏書始堯舜而當時大儒董仲舒亦云推神農爲九皇改號軒轅謂之黃帝因存帝顓頊帝嚳帝堯帝舜爲五帝遷故作五帝本紀孔安國爲博士考正古文獨見周禮據外史掌三皇五帝之書左傳云左史倚相能讀三墳五典八索九丘史克曰少皞氏有不才子郟子曰我高祖少皞摯之立也安國以周禮爲古文而不知周禮經周末秦漢增損僞妄尤多故尚書序云伏犧

神農黃帝之書謂之三墳少昊顓頊高辛唐虞之書謂之五典孔穎達云三墳之書在五典之上數與三皇相當墳又大名與皇義相類故云三皇之書堯舜典是二帝之典推此而上則五帝當五典三墳五典已經芟夷存者二典而已書緯云帝嚳以上朴略難傳唐虞以來煥炳可法禪讓之首至周五代此皆無所稽據穿鑿妄說耳史克又云縉雲氏郟子又云共工氏豈皆帝乎論者以世本帝繫大戴禮五帝德家語宰我問與史記本紀同以黃帝爲五帝則三皇乃少一人故甄耀度以燧人

白虎通以祝融或以共工同犧農爲三皇鄭玄注
中候敕省圖引運斗樞以伏羲女媧神農爲三皇
軒轅少昊高陽高辛陶唐有虞六代爲五帝德合
北辰得天皇之氣者皆稱皇協五帝座星者皆稱
帝故三皇三而五帝六也梁武帝以伏羲神農燧
人爲三皇黃帝少皞顓頊帝嚳帝堯爲五帝而曰
舜非三王亦非五帝與三王爲四代而已鄭及諸
儒自相譏病其指不通世本經秦歷漢儒者改易
大戴禮出於世本家語王肅私定以難鄭玄故有
冉有問孔子三皇五帝不用五刑案孔子時未有

通鑑外紀卷二 梁紀
三

語三皇五帝言者皆周末秦已後僞書耳馬昭云
家語王肅增加非鄭玄所見孔穎達云王肅欲家
語與經傳符同故彊爲之辭冀合其說所言雖同
司馬遷而不足爲遷之助賈逵云三墳三皇之書
五典五帝之典延篤言張平子說三墳三禮禮爲
人防爾雅曰墳大防也書曰誰能典朕三禮天地
人之禮也五典五帝之常道也馬融云三墳三氣
陰陽始生天地人之氣也五典五行也杜預云皆
古書名漢晉羣儒論三墳五典亦與孔說不同惟
鄭玄注周禮外史三皇五帝之書云楚靈王所謂

三墳五典此說出於孔安國非其新意賈公彥云
孔鄭之說無正文故延叔堅馬季長所解有異也
或說董仲舒對程雅曰三皇三才也五帝五常也
三王三明也五伯五嶽也其說全無意義非仲舒
之言也或曰左氏傳禮記祭法有少昊顓頊帝嚳
名號豈可據繫辭皆去之以堯舜次黃帝無乃太
略乎答曰儒學論議當本於經顧彪謂正可依經
誥大典不可用傳記小說此言得之先儒云女媧
至無懷氏十五帝臨魁至榆罔七帝承襲犧農而
王然則少昊已後亦嗣黃帝如無懷臨魁比也至

堯功德特高別爲一代又自古以來皆傳其子或以干戈逆取而堯及舜皆有子擇賢而授不私其親上古以來二人而已故可上紹黃帝而繼犧農藝文志云孝文時得魏文侯樂人竇公獻其書乃周官大宗伯之大司樂章也桓譚新論云竇公時年百八十歲武帝時河間獻王好儒與毛生等共采周官及諸子言樂事者取公孫尼子以作樂記大司樂舞雲門以祀天神咸池以祭地示大磬以祀四望通夏殷周爲六樂樂記曰武王封黃帝堯舜夏殷之後爲三恪二王後黃帝而及堯舜不數

少皞顓頊帝嚳寶公所傳在秦焚書之前獻王采
錄古書可以取信然大司樂有雲門大卷大咸而
樂記有大章咸池已差異矣包犧神農世遠樂名
不見少皞顓頊帝嚳承黃帝之後不特爲一代故
無樂名孝經鉤命決云伏犧樂曰立基神農曰下
謀祝融曰屬續帝系譜云伏犧樂曰扶來神農曰
扶持帝王世記云少皞樂曰九淵樂緯云顓頊樂
曰五莖帝嚳曰六英漢禮樂志云顓頊作六莖帝
嚳作五英皆緯書帝系諸譜漢志世紀放六樂撰
其名故多差異非本稱也秦初并六國丞相等議

通鑑外紀卷之二 卷之二
帝號曰古有天皇有地皇有泰皇泰皇最貴臣等
上尊號王爲泰皇王曰去泰著皇采上古帝位號
號曰皇帝乃知秦以前諸儒或言五帝猶不及三
皇後代不考始皇本紀乃曰兼三皇五帝號曰皇
帝誤也西漢之末去聖益遠孔安國尚書傳雖未
立於學官而儒者惑於安國司馬遷二家殊異又
怪易繫大司樂樂記以堯舜上繼黃帝雖劉歆博
物洽聞疑而未了故三統歷本易始於包犧至少
皞顓頊帝嚳乃曰周舉其樂故易不載而不明言
舉樂及不載之義鄭玄注易繫辭云金天高陽高

辛遵皇帝之道無所改作故不述焉崔靈恩曰舞
樂之始興於黃帝其德宜法遠存其後敬之爲恪
顓頊高陽二代之君雖復爲樂進非始舞之制又
非宜今之用故越之而用雲門不立其樂亦不爲
恪也能安生解禮周以黃帝堯舜之後爲三恪但
云取其制作之人孔穎達謂易略舉五帝之終始
則少皞顓頊帝嚳在其閒也歷世紛紜莫知定論
皆泥於舊文肆爲解釋不可強通易云作八卦爲
罔罟取諸離包犧氏也爲耜耒取諸益日中爲市
取諸噬嗑神農氏也垂衣裳取諸乾坤爲舟楫取

諸渙服牛乘馬取諸隨重門擊柝取諸豫爲杵臼
取諸小過弧矢取諸睽黃帝堯舜也至於宮室取
大壯棺槨取大過結繩而治易之以書契取諸夬
蓋世遠難明傳聞殊異仲尼於疑事則闕而不強
爲之辭六事則總言黃帝堯舜三事但曰後世聖
人而孔安國尚書序乃曰伏犧氏造書契以代結
繩之政指言伏犧與繫辭文意相反按家語篇後
及史記孔子世家云安國至臨淮太守蚤卒連叢
子有孔臧報從弟侍中書言以隸篆定尚書五十
餘篇並爲之傳卽安國也安國於經義不詳故書

傳多差謬馬鄭王肅諸儒悉解今文尚書晉宋後
始行古學獨有孔傳因而傳之其學非能優於諸
家也

資治通鑑外紀卷第一

終

通鑑外紀卷一

帝舜

帝舜

三

開化圖書館

Kaishwa library

資治通鑑外紀卷第二

宋 京兆萬年劉 恕 編集

夏商紀

夏

起戊戌終巳酉十七君一十四世通羿浞四百三十二年

夏后氏禹元年

戊戌都安邑

或云平陽亦云晉陽及韓

尚黑其社用

松牲用玄以黑為徽號朝燕服收冠而黑衣十寸為尺封丹朱於唐商均於虞皆為諸侯作樂曰大夏命臯陶為夏籥九成以昭其功夏大也言能大堯舜之德以五音聽治懸鐘鼓磬鐸鞀待四方之士為銘於箕虞曰教寡人以道者擊鼓論以義者擊鐘告以事

者振鐸語以憂者擊磬有獄訟者搖鞀一饋而十起
一沐三捉髮以勞天下之民出見罪人下車問而泣
之左右曰罪人不順道君王爲何痛之禹曰堯舜之
人皆以堯舜之心爲心寡人爲君百姓各自以其心
爲心是以痛之初舜分天下爲十二州禹復爲九州
收天下美銅鑄爲九鼎以象九州昔黃帝作車少皞
加牛奚仲加馬禹命奚仲爲車正建旗旂旒以別尊
卑等級古有醴酪禹時儀狄作酒禹飲而甘之遂疏
儀狄絕旨酒曰後世必有以酒亡國者禹任臯陶益
以國政臯陶卒封其後於英六或在許契后稷伯夷

皆有功興於虞夏之際益垂夔龍其後不知所封是
時天雨金三日亦嘗雨稻禹娶塗山氏女生子啓南
巡守會諸侯於塗山承唐虞之盛執玉帛者萬國濟
江黃龍負舟舟中人懼禹仰天而歎曰吾受命於天
竭力而勞萬民生寄也死歸也余何憂於龍焉視龍
猶蝮蛇顏色不變龍俛耳低尾而逝禹致羣臣於會
稽防風氏後至禹戮之防風汪芒氏之君漆姓守封

嶠之山禹崩

諡法淵源流通曰禹馬融曰禹湯不在
諡法蓋諡法諸本不同或後人所加也

葬會稽之山陰

在位九年年百歲案書稱堯舜曰帝
夏殷曰王詩商頌曰玄王武王學者

言夏殷周稱王而詩書易春秋未嘗言三王惟易泰
歸妹卦曰帝乙歸妹書酒誥多士多方曰自成湯至

通鑑小紀卷之二

夏

二

于帝乙故司馬遷夏殷之君皆曰帝曲禮曰告喪曰天王登假措之廟立之主曰帝譙周曰夏殷之君生稱王死稱廟主皆以帝號配之帝王世紀夏殷曰帝曲禮秦漢後書譙周皇甫謐之說出於史記俱不足據為

夏后氏禘黃帝而祖顓頊郊鯀而宗禹

劉恕曰大江之南前代要服舜禹南巡崩不返葬

禹非不尊而敬舜也啓非不孝於其父也時享在

乎廟貌魂氣則無所不之也秦漢以下崇尚墓祭

違經棄禮遠事尸柩難以語乎理矣

啓元年丁未皇甫謐曰甲辰筮享神於大陵之上是為鈞臺之享

又筮於晉之墟作璿臺於水之陽有扈氏不服啓伐

之世本曰有扈夏同姓或云啓之庶兄以堯舜傳賢禹獨與子故伐啓淮南子曰有扈氏爲義而亡

啓崩在位九年皇子太康立

太康元年丙辰失德四夷背叛畋于有洛之表十旬弗反

有窮后羿因民弗忍距于河羿先祖世爲射官帝賜

之弓矢使司射夏衰自鉏遷于窮石許慎曰羿帝嚳射官也淮南子

曰堯時十日竝出堯命羿仰射十日中其九日九鳥皆死墮其翼羽又曰羿請不死之藥於西王母其妻

姮娥竊之奔月宮爲月精又曰羿除天下之害死而爲宗布孟子曰逢蒙學射於羿盡羿之道思天下惟

羿爲愈已於是殺羿楚辭天問曰羿焉彈日鳥焉解羽歸藏易曰羿彈十日說文曰彈射也博物志曰羿

與鑿齒戰于疇華之野羿持弓鑿齒持矛羿殺之或曰河伯弱殺人羿射其左目風伯壞人屋室羿射中

其膝據此諸說帝嚳堯時各有羿夏時又有羿則太羿是善射之號非人名字不知此羿其名爲何

龍蓋小已... 夏... 三

康失國而崩在位二十九年孔安國曰太康不得入國羿遂廢之羿立其弟仲

康

仲康元年乙酉微弱政出於羿崩在位十年子相立

相一作相安征吠夷黃夷竹書紀年曰其後干夷來

賓紀年曰東夷有九種曰吠夷干夷方夷黃夷白夷

赤夷玄夷風夷陽夷相為羿所逐失國居商丘依夏

同姓諸侯斟灌斟鄩在位二十八年呂氏春秋曰夏

六卿請復之相曰不可吾地不淺吾民不寡戰而不

勝是吾德薄而教不善也於是乎處不重席食不貳

味琴瑟不張鐘鼓不修子女不飭親親長長尊賢使

能暮年而有扈氏服書稱啓與有扈戰于甘之野而

不言勝敗帝相之時政出於羿已數十年既

能修德以服有扈豈不能服羿乎此說近誣

有窮后羿因夏民以代夏政

元年丙寅

樂正后夔之子伯

封實有豕心貪恡無饜忿類無期謂之封豕羿滅之夔是以不祀羿恃其善射不修民事而淫于原獸棄武羅伯因熊髡龍圍而用寒浞寒浞伯明氏之讒子弟也伯明后寒棄之夷羿收之信而使之以為已相浞行媚于內施賂于外愚弄其民而虞羿于田樹之詐慝外內咸服羿猶不悛將歸自田家衆殺而亨之以食其子其子不忍食死于窮門浞自立

羿在位八年

寒浞

元年甲戌

因羿室不改有窮氏之號生澆及豷澆長

浞使用師殺斟灌伐斟鄩氏滅夏后相后緡方娠逃

出自竇歸于有仍生少康浞處澆于過處豷于戈少
康既長為仍牧正憇澆能戒之澆使椒求之逃奔有
虞為庖正虞君思妻之二姚而邑諸綸有田一成有
衆一旅能布其德而兆其謀以收夏衆撫其官職浞
恃其讒慝詐偽而不德于民夏遺臣靡自有鬲氏收
二國之燼滅浞而立少康浞在位三十二年使女艾諜澆滅

澆于過使子季杼誘豷滅豷于戈有窮逐亡

寒浞殺羿囚羿

室而生澆澆長大能用師滅后相相死之後少康始生及滅浞少康子杼又長已堪誘殺豷計太康失邦及少康紹國向百年夏亂甚矣而夏本紀不載最為疏略

少康滅浞還舊都

元年

復禹之績祀夏配天不失舊

物夏道復興方夷來賓崩

在位二十一年

子杼立

杼

一作子元年丁卯在位十七年

崩子槐立杼能帥禹者也夏后氏

報焉

槐

帝王世紀作芬或作祖武亦作魁元年甲申

九夷來御

竹書紀年曰三年

崩在位

二十六年子芒立

芒

元年庚戌在位十八年帝王本紀云十三年

崩子泄立

泄

帝王世紀作世或作宗元年戊辰

吠夷等六夷服從始加爵命崩

在位十六年紀年曰帝泄二十一年加吠夷等爵命與帝王本紀不同

子不降立

不降

一作江成元年甲申在位五十九年

崩弟扃立

扃

帝王世紀作喬元年癸未在位二十一年

崩子廛立

塵帝王世紀作廣或作厘崩不降子孔甲立

孔甲元年甲辰在位二十年淫亂好鬼神德衰諸侯多叛周語曰孔甲亂夏四世而

隕天降乘龍河漢各二有雌雄孔甲不能食而未獲

參龍氏陶唐氏既衰其后有劉累學擾龍于參龍氏

事孔甲能飲食之夏后嘉之賜氏曰御龍以更豕韋

之後龍一雌死潛醢以食夏后夏后饗之既而使求

之懼而遷于魯縣孔甲崩在位三十一年汲冢紀年曰胤甲即位居西河十日

竝出其年胤甲陟子皐立

皐元年乙未崩子癸立

發一作敬元諸夷賓于王門獻其樂舞紀年曰崩在

十三年帝王本
紀云十一年
子履癸立是爲桀

桀元年自孔甲以來諸侯叛夏桀爲無道暴戾頑貪

虐政淫荒武傷百姓天下顛恐而患之桀有力能申
鐵鉤索伐有施有施人以妹喜女焉妹喜有寵所言
皆從爲傾宮瑤臺殫百姓之財肉山脯林酒池可以
運船糟隄可以望十里一鼓而牛飲者三千人妹喜
笑以爲樂初商契卒子昭明立居於砥石遷于商卒
子相土立相土作乘馬卒子昌若立卒子曹圉立卒
子根國立卒子冥立爲司空勤其官而水死子振立
卒子微立卒子報丁立卒子報乙立卒子報丙立卒

子主壬立卒子主癸立卒子天乙立

譙周曰商人尊湯曰天乙天即

帝也是為成湯名履

母曰扶都

長九尺自契至湯八遷

商頌曰帝

立子生商是契居商也鄭玄曰在太華之陽皇甫謐曰今上洛商世本曰昭明居砥石左傳曰陶唐氏之

火正闕伯居商丘相土因之杜預曰梁國睢陽也及湯居亳四遷事見經傳而不見餘四遷湯始

居亳從先王居

鄭玄曰亳今河南偃師縣有湯冢已氏有書音義曰濟陰亳縣有湯冢已氏有

伊尹冢杜預曰梁國蒙縣北有亳城城中有湯冢其西又有伊尹冢皇甫謐曰孟子稱湯居亳與葛為鄰

葛伯不祀湯使亳眾為之耕葛即今梁國寧陵之葛鄉也若湯居偃師去寧陵五百餘里豈當使民為之

耕乎亳今梁國穀熟縣也蒙為北亳即景亳湯受命之地穀熟為南亳即湯都也偃師為西亳即盤庚所

徙三地皆名為亳尚書立政所謂伊尹耕於有莘之

三亳也古書亡滅未知孰得其實

野 孫武及呂氏春湯使人以幣聘之三反然後肯從

解

見湯言素王及九主之事或曰湯聞伊尹賢使人請
之有莘氏不可伊尹亦欲歸湯湯婚於有莘氏乃以
伊尹爲媵送女湯得伊尹被之於廟照之以燭爨以
犧豶明日設朝而見之請湯以至味湯曰可得而爲
之乎對曰君之國小不足以具之爲天子然後可也
因說湯以伐夏救民湯進於桀桀與之飲酒沈酒羣
臣醉者持不醉者不醉者持醉者相和而歌曰江水
沛兮舟楫敗兮我王廢兮盍歸乎盍歸乎薄亦大矣
伊尹退而閑居深取樂音更曰樂兮樂兮四牡驕兮
六轡沃兮覺兮較兮吾大命格兮去不善而從善何

不樂今伊尹入告于王曰大命之至亡無日矣王闢
然拊啞然笑曰子又詖言矣天之有日猶吾之有民
日有亡乎日亡吾乃亡矣伊尹既醜有夏復歸于亳
報湯曰桀迷惑妹喜不撫其衆上下相疾民心積怨
皆曰上天弗恤夏命其卒湯復使伊尹往視夏聞妹
喜言曰天子夢兩日相與鬪東方日不勝伊尹以告
湯任伊尹以國政桀臣于辛恃威凌轢諸侯以及兆
民左師曹觸龍諂諛不正賢良鬱怨諸侯不賓關龍
逢引黃圖進諫曰古之人君躬行禮義愛民節財故
國安而身壽今君用財若無窮殺人若恐弗勝天殃

必降而誅必至君其革之立而不去桀於是焚黃圖
殺龍逢衆庶莫敢直言大臣同患桀愈自賢國人大
崩湯使人哭之乃囚於夏臺已而得釋桀爲仍之會
有緡叛而攻克之是時主闇晦而不明道瀾漫而不
脩至德滅而不揚帝道揜而不興舉事戾蒼天發號
逆四時春秋縮其和天地除其德人君處位而不安
大夫隱道而不言羣臣準上意而懷當邪人參耦比
周而陰謀居君臣父子之間競載驕主而像其意亂
人以成其事君臣乖而不親骨肉疏而不附植社槁
而埤裂容臺振而掩覆犬羣嗥而入淵豕銜蓐而席

澳美人挈首墨面而不容曼聲吞炭內閉而不歌喪
不盡其哀獵不聽其樂西老折勝黃神嘯吟飛鳥鍛
翼走獸廢脚山無峻榦澤無注水狐狸首穴馬牛放
失田無立禾路無莎蘋金積折廉壁襲無理磬龜無
腹著策日施桀見錄書云亡夏者桀大誅豪傑在位
以來回祿信於聆隧百川沸伊洛竭泰山走山石三
日泣宮中女子化爲龍俄而復爲婦人甚麗而食人
桀命爲蛟妾告吉凶鶴鳴於國十日十夕不止天雨
血雨木冰六月霜降爲夜宮於深谷之中男女雜處
桀三旬不出聽政一夕大風揚沙填宮合之鬼哭於

國地出黃霧堯山崩成山亡兩日鬪五星隕錯行在
矢流大水地震雷霆殺人瞿山地裂水出十月鑿山
穿陵通之於河諫者曰洩天氣發地藏天子失道後
必有敗桀殺之碁年瞿山崩爲大澤水深九尺山覆
於谷下反在上耆老諫而被殺大費子之玄孫費昌
見二日出東者炤西者沈問於馮夷夷曰西唯夏東
唯商桀將亡費昌聞而歸湯湯出見張網四面祝曰
從天墜者地出者四方來者皆離吾網湯曰嘻盡之
矣非桀孰能爲此乃解其三面置其一面更教之祝
曰欲左者左欲右者右欲高者高欲下者下不用命

者乃入吾網漢南諸侯聞之曰湯德及禽獸歸之者
四十國湯欲伐桀伊尹請之貢職以觀夏動桀怒起
九夷之師伊尹曰未可彼尚能起九夷之師是罪在
我也湯乃謝請復入貢職太史終古出其圖法執而
泣之桀迷惑暴亂愈甚終古奔商湯告諸侯曰夏王
無道暴虐百姓窮其父兄恥其功臣輕其賢良棄義
聽讒衆庶咸怨守法之臣自歸于商明年商湯元年湯
伐滅桀在位五十一年謚法賊人多殺曰桀三統歷
曰夏十七王四百三十二年汲冢紀年曰四
百七十一年六韜曰禹之後分封以國爲姓有夏后
禹三十一世至桀氏有扈氏有男氏斟尋氏彤城氏褒氏費氏杞氏緡

氏辛氏冥氏斟氏戈氏

商

起庚戌終戊寅三十君十七世六百二十九年

成湯元年

湯在諸侯位十七年即天子位元年庚戌顧彪曰殷家猶質踰月即改元年以明世

異不待正月為首案湯以干戈取天下與堯舜殊異即位易代必不俟踰年改元亦不俟踰月也

又乏職貢夏桀起九夷之師九夷之師不至伊尹曰

可矣昔高辛火正祝融氏名黎其後八姓已姓昆吾

蘇顧温也董姓鬲夷豢龍也彭姓彭祖豕韋諸稽也

禿姓舟人也妘姓鄔鄒路偃陽也曹姓鄒莒也莘姓

也斟姓也惟斟姓無後或云帝嚳之祝融吳回生陸

終陸終生子六人坼剖而產其長曰昆吾二曰參胡

三曰彭祖四曰會人五曰安六曰季連夏末昆吾氏
伯而爲亂湯有景亳之命帥兵自把鉞伐韋顧及昆
吾以費昌爲御而伐桀令師從東方出於國西以進
桀戰敗於有娥之虛奔鳴條謂人曰吾悔不殺湯於
夏臺使至此放于南巢而死諸侯大會湯再拜而從
諸侯之位曰天子惟有道者可以處之可以治之三
讓諸侯皆莫敢當然後湯踐天子位反桀之事遂其
賢良以寬治民而除其邪徇民所喜遠近歸之順天
革命改正朔以建丑爲正月變服殊號一文一質示
不相沿易民視聽若天時大變尙白其社用石莖樹

松牲用白以白爲徽號朝燕服皐冠而縞衣十二寸
爲尺初置二相以伊尹仲虺爲之湯謂伊尹曰諸侯
來獻遠方之物不利吾欲因其地勢所有易得而不
貴伊尹受命爲四方獻令自伐桀大旱七年洛坼川
竭煎沙爛石大史占之曰當以人禱湯曰吾所爲請
雨者民也若必以人禱吾請自當遂齋戒剪髮斷爪
素車白馬身嬰白茅以身爲犧牲禱於桑林之野持
三足鼎祝山川曰無以余一人之不敏使上帝鬼神
傷民之命以六事自責曰政不節與民失職與宮室
崇與婦謁盛與苞苴直行與讒夫倡與何不雨之極也

言未已大雨方數千里人無食者湯以莊山之金鑄幣救之命伊尹作樂曰大護修九招六列以見其善護言以寬政治民除其邪虐覆護下民各得其所聞宮聲使人溫良而寬大聞商聲使人方廉而好義聞角聲使人惻隱而仁愛聞徵聲使人樂養而好施聞羽聲使人恭敬而好禮湯作曆弗復以正月朔旦爲節更以十一月冬至爲元首至周從之湯令未命之爲士者車不得朱軒及有飛軫不得乘飾車駢馬衣文繡命然後得以順有德初作囿取禽獸以奉宗廟簡士卒習射御以戒不虞海外肅慎北發渠搜氏羌

來服湯娶有莘氏女生子太丁外丙仲壬太丁為太

子蚤卒湯崩

在位十三年年百歲謚法雲行雨施曰湯除虐去殘曰湯

葬亳北商

人禘舜而祖契郊冥而宗湯上甲微能帥契者也故

報焉

皇甫謚曰微字上甲

外丙

元年癸亥在位二年

崩

仲壬

一作中壬元年乙丑在位四年

崩伊尹立成湯適長孫太丁之

子太甲

太甲

元年巳巳尚書伊訓成湯既沒太甲元年孔傳云湯沒而太甲立孟軻司馬遷云湯崩外丙仲

壬皆即位乃及太甲與書不同劉歆班固皇甫謚皆違經從軻遷未詳其旨

既立不明顛

覆湯之典刑伊尹放諸桐而攝政當國以朝諸侯王

徂桐宮悔過自責反善三祀十有二月朔伊尹以冕

服奉嗣王歸于亳而授之政作太甲三篇以戒之

汲冢

紀年曰殷仲壬即位居亳其卿士伊尹仲壬崩伊尹放太甲于桐乃自立也伊尹即位於太甲七年太甲潛出自桐殺伊尹乃立其子伊陟伊奮命復其父之田宅而中分之案書序伊尹奉太甲歸于亳其文甚明左傳伊尹放太甲而相之卒無怨色孟子云有伊尹之志則可無伊尹之志則篡伊尹不肯自立太甲不殺伊尹也必矣若伊尹放君自立太甲起而殺之則伊尹死有餘罪義當汗宮滅族太甲何所感德而復立其子還其田宅乎紀年之書晉太康元年汲郡民發魏安釐王冢得之蓋當時流俗有此妄說其書因記之杜預曰紀年與尚書叙說太甲事乖異不知老叟之伏生或致昏忘將此古書亦當時雜記未足以取
太甲修德諸侯歸之在位三十三年
逸出無
崩亦

稱祖甲

孔安國曰殷家祖有功故稱祖甲本紀曰褒太甲稱太宗

子沃丁立

沃丁

元年壬寅

伊尹卒葬亳

皇甫謐曰沃丁八年伊尹卒年百餘歲大霧三日沃丁葬

之以天子禮祀以太牢親臨喪以報大德焉

沃丁崩

在位二十年

弟太庚立

太庚

元年辛未

崩于小甲立

小甲

元年丙申在位三十六年帝王本紀云五十七年

崩弟雍已立

雍已

元年壬申

商道衰諸侯或不至崩

在位十年弟太戊立

中宗太戊

元年乙酉

亳有祥桑穀共生于朝七日大拱太

戊懼問於其相伊陟伊陟曰臣聞妖不勝德君之政

其有關與君其修德太戊退而占之曰野木生於朝

意者國亡乎太戊修先王之政明養老之禮早朝晏

退問疾吊喪三日而祥桑枯死三年遠方重譯而至

七十六國

尚書大傳曰成湯之後武丁之先王道虧桑穀俱生于朝七日而大拱武丁問諸祖

身修行思昔先王之道與滅國繼絕世舉逸民明養

老之道三年之後諸侯以譯來朝者六國劉向日殷

道既衰高宗承敝而起盡諒陰之哀天下應之既獲

顯榮怠于政事國將危亡故桑穀之異見桑猶喪也

穀猶生也殺生之秉失而在下也案伏生劉向以武

丁有桑穀而向著說苑以太戊武丁時俱有桑穀呂

氏春秋湯時穀生于廷比旦而大拱韓詩外傳三日

而大拱皆與書序不同

太戊贊伊陟于廟言弗臣巫咸治王家有成及用臣

扈商復興諸侯歸之尊其德稱中宗在位七十五年

崩子仲丁立

仲丁元年自亳遷都蹕藍夷為寇仲丁征之崩在位

十一

年弟外壬立

外壬 元年辛亥在位十五年 崩弟河亶甲立

河亶甲 元年丙寅 遷都相商復衰崩 在位九年 子祖乙立

祖乙 元年乙亥 遷都耿為水所圯遷於邢或云奄巫賢任

職商復興崩 在位九年 子祖辛立

祖辛 元年甲午在位十六年 崩弟沃甲立

沃甲 一作開甲 元年庚戌在位二十年 崩祖辛子祖丁立

祖丁 元年庚午在位三十二年 崩沃甲子南庚立

南庚 元年壬寅在位二十九年 崩祖丁子陽甲立

陽甲 元年辛未 自仲丁以來廢適而立諸弟子弟子爭立

比九世亂商衰諸侯莫朝崩在位七年帝王本紀云十七年弟盤庚

立

盤庚元年將涉河南遷都自湯至盤庚五遷無定處

民咨胥怨不欲徙盤庚乃告諭諸侯大臣曰昔高后

成湯與爾之先祖俱定天下法則可修舍而弗勉何

以成德遂渡河南復居湯之故居治亳殷亳是大名殷是亳內

之別名鄭玄曰治于亳之殷地汲冢古文云盤庚自

奄遷于殷殷在鄴南三十里與書涉河不同史記祖

乙遷于邢亦不知出何書鄭玄曰祖乙去相居耿為

水所圯毀修德以禦之不復徙也又云其後奢侈踰

禮土地迫近山川嘗圯焉至陽甲立盤庚為臣乃謀

徙居湯舊都又序注云民居耿久奢淫成俗故不樂

徙王肅曰自祖乙五世至盤庚元兄陽甲宮室奢侈

下民邑居墊隘水泉瀉鹵不可以行政化故徙都于

殷皇南謚曰耿迫近山川自祖辛以來民皆奢侈故
盤庚遷殷書盤庚下篇云今我民用蕩析離居孔傳
云水泉沈溺孔穎達云地勢洿下久居水變水泉瀉
鹵不可行行化故欲遷都不必為奢侈也此以君名名
篇必是為君時事而鄭玄以上篇自此改號曰殷以
是盤庚為臣時事未知何所考據
來言殷者史臣追書也
盤庚行湯之政遵湯之德殷道復興諸

侯來朝崩在位二十八年弟小辛立

小辛元年丙午殷復衰崩在位二十一年弟小乙立

小乙元年丁卯崩于武丁立

高宗武丁元年戊子為太子時盡知人民之所好惡能聳

其德至于神明親喪居廬三年未嘗及國事默以思
道而天下無倍叛之心既免喪思復興殷未得其佐

不言政事決定於冢宰卿士患之曰王言以出令若
不言無所稟令武丁作書曰以余正四方余恐德之
不類茲故不言夢得良弼曰說視羣臣百吏皆非也
廼使百工以象夢於野旁求四方之賢是時說爲胥
靡築於傅巖武丁得而與之語立以爲相總百官使
朝夕規諫殷衰而復興禮廢而復起國家大治遂以
傅險姓之號曰傳說皇甫謐曰高宗夢天賜賢人胥
靡之衣裳之而來口云我徒也
姓傳名說天下得我者豈徒也哉武丁寤而推之曰
傳者相也說者權說也天下由有傳我而說民者哉
明日以夢視百官百官皆非也乃使百工寫其形象
求諸天下果見築者胥靡衣褐帶索執役于虞號之
間傳巖之野名說以其得之傳巖謂之傳說案謐言
初夢卽云姓傳名說又言得之傳巖謂之傳說其言

自不相副謚見書傳會爲近世之語非實事也墨子曰傳說居北海之洲園土之上衣褐帶索庸築于傳巖之城

劉恕曰武丁卽位之初殷道中衰甘盤遜世朝多具臣傳說賢而隱于胥靡一旦舉而用之出于微賤衆必駭怪故託於夢寐旁求天下置諸左右如天所授羣臣莫之疑懼而傳說之道得行也若不知其才徒以夢取則與王莽按符命以王興王盛爲四將光武據讖用王梁爲司空何異哉仲尼刊書而存之可以見武丁之意矣

武丁開先祖之府取其明法以爲君臣上下之節祭

通鑑外紀卷二
成湯有飛雉升鼎耳而雉武丁懼祖已訓諸王作高
宗彤日高宗之訓祖已日遠方將有來朝者武丁內
反諸已以思王道三年編髮重譯來朝者六國自是
服章多用翟羽孔子曰吾於高宗彤日見德有報之
疾也苟由其道致其仁故遠方歸德焉劉向以為武
丁恐駭謀于忠賢修德而正事內舉傳說授以國政
外伐鬼方三年乃克以安諸夏感變而懼災眚自消
修政行德天下咸驩殷道復興在位五十九年崩立
其廟為高宗子祖庚立

祖庚

元年丁亥
在位七年

崩弟祖甲立

祖甲

一作辛甲元年甲午

淫亂殷復衰崩

在位十六年

子廩辛立

鄭玄

曰祖甲兄祖庚賢其父武丁欲廢兄立弟祖甲以為不義逃于人間孔安國曰無逸所稱祖甲湯孫太甲

也周語曰帝甲亂之七世而隕

廩辛

一作馮辛元年庚戌在位六年

崩弟庚丁立

庚丁

元年丙辰在位六年帝王本紀云二十三年

崩子武乙立

武乙

元年壬戌

徙都河北國中衰敝東夷寢盛分遷淮岱

漸居中土

昔后稷卒子不窋立

母曰姁氏

世后稷及夏

之衰棄稷不務不窋用失其官而自窋于戎狄之間

韋昭曰啓子太康廢稷之官不復務農不窋失官去夏而遷于邠史記曰慶節國于豳鄭玄豳詩譜曰公劉以太康時失其官守窋于此地猶修后稷之業勤恤愛民民咸歸之而國成焉案大雅公劉篇說公劉

遷幽事詳悉故鄭以自郃徙幽必從公劉始蓋不窋之時已窋幽地尚往來郃國至公劉而盡以郃民遷

卒子鞠立卒子公劉立公劉雖在戎狄復脩后稷之

業務耕種行地宜自漆沮渡渭取材用行者有資居

者有畜積百姓懷之多徙而保歸焉周道自此而興

詩人歌樂其德公劉卒子慶節立卒子皇僕立卒子

差弗立卒子毀隃世本立卒子公非立皇甫謐曰卒

子高圉立卒子亞圉立世本日亞圉雲都皇卒子公

叔祖頹立一本作太公叔頹世本日亞圉生太公組

公叔祖頹叔頹組卒子古公亶父立復脩后稷公劉

紺諸蓋是一人也之業積德行義國人戴之武乙暴虐犬戎寇邊薰育

狄人來攻古公事之以皮幣犬馬珠玉菽粟財貨不
得免焉狄人又欲土地古公曰與之耆老曰君不為
社稷乎古公曰社稷所以為民也不可以所為亾民
也耆老曰君不為宗廟乎古公曰宗廟吾私也不可
以私害民夫有民立君將以利之與人之兄居而殺
其弟與人之父居而殺其子以其所養害所養吾不
忍也民之在我與在彼為吾臣與狄人臣奚以異哉
二三子何患無君杖策而去率其私屬出豳渡漆沮
踰梁山邑于岐山之陽始改國曰周

徐廣曰梁山
南有周原 豳

人曰仁人之君不可失也舉國扶老攜弱從之者二

千乘一止而成三千戶之邑旁國聞其仁亦多歸之
 古公乃貶戎狄之俗營築城郭室屋而邑別居之作
 五官有司民皆歌樂頌其德古公娶有台氏女曰太
 姜賢而有色生太伯仲雍季歷化導三子皆成賢德
 古公有事諮謀焉季歷娶摯國任氏之中女曰太任
 亦賢婦人生昌有聖瑞在母不憂在傅弗勤處師弗
 煩事父不怒孝友二號昌弟號仲號叔比於諸弟古公曰我
 世當興其在昌乎太伯仲雍知古公欲立季歷以傳
 昌二人乃奔荆蠻以避之太伯自號句吳荆蠻義之
 從而歸之者千餘家古公卒六韜曰太王壽百二十年季歷立是

為公季

王肅曰太伯見王季生文王知天命之有在去而適吳大王沒而不反或曰古公將卒謂

季歷曰我死汝讓兩兄彼即不受汝有義而安矣古公卒季歷之吳召二兄相從而歸羣臣欲立之太伯

仲雍以先君命固讓季歷復如荆蠻脩古公之遺道篤於行義諸侯順

之公季伐西落鬼戎俘其狄王武乙無道為偶人

謂之天神令人為行與之博天神不勝僂辱之為革

囊盛血仰而射之命曰射天獵於河渭之間暴雷震

死在位四年竹書紀年曰武乙三十子太丁立

太丁元年丙寅周公季伐燕京之戎周師大敗紀年曰太

其後周伐余無之戎克之太丁命公季為牧帥紀年曰太

丁四又伐克始呼之戎紀年曰太翳徒之戎捷其三

通鑑卜已

大夫太丁崩

在位三年紀年曰太丁十一年周伐翳徒戎與帝王本紀不同

子乙立

乙一作辛乙元年巳巳

殷益衰周公季宅程以功九命作伯受

珪瓚秬鬯之賜卒

六韜曰王季壽百年

子昌立昌十二而冠

文王

十三生伯邑考左傳曰冠而生子禮也許慎五經異義曰左氏說歲星十二年一周天天道備故人君子

十二可

長十尺嗣位遵后稷公劉之業則古公公季

之法篤仁敬老慈少禮賢者日中不暇食以待士太

顛闕天散宜生南宮适鬻子辛甲尹佚之徒皆往歸

之昌詢于八虞

賈逵曰八虞周八士皆在虞官

諮于二虢以為卿士

度於闕天而謀於南宮諏於蔡原而訪於辛尹重之

以周召畢榮億寧百神而柔和萬民昔陸終第三子

曰彭祖氏其裔孫曰大彭豕韋爲商伯而滅弟六子
曰季連生附沮附沮生穴熊其後中微或在中國或
在蠻夷弗能紀其世鬻子名熊卽其苗裔也年九十
見周昌昌曰老矣鬻子曰捕虎逐麋臣已老矣使臣
坐而策國事臣尚少也辛甲嘗事紂七十五諫不聽
而適周召公與語以爲賢告昌昌親迎之以爲公卿
召公奭畢公高周同姓或云皆昌庶子昌卽位之八
年六月寢疾五日而地動東西南北不出國郊有司
曰地之動爲人主也羣臣皆恐請興事動衆增國城
以移之昌曰天之見妖以罰有罪我必有罪天以罰

我請改行其可免乎於是謹其禮秩皮革以交諸侯
飭其辭令幣帛以禮俊士頒其爵列等級田疇以賞
有功無幾疾止 乙之妻子同母三人長曰微子啓

次日中衍季曰受德受德乃紂也

鄭玄曰乙愛少子
辛欲立焉號曰受

德傳聲
轉作紂

其母為后而生紂尚少乙及后以啓賢欲立

為太子太史據法爭之曰有妻之子不可立妾之子

故紂為後乙崩

在位三十七年

辛天下謂之紂

元年丙午

資辨捷疾聞見甚敏材力過人

手格猛獸知足以鉅諫言足以飾非以為天下皆出

已之下始為象箸箕子歎曰彼為象箸必不盛以土

盞將爲犀玉之杯玉杯象箸必不羹菽藿衣裋褐而
舍於茅茨之下則錦衣九重高臺廣室稱此以求天
下不足矣遠方珍怪之物輿馬宮室之漸自此而始
故吾畏其卒也鄭玄王肅曰箕子紂之諸父服虔杜預曰紂之庶兄司馬彪曰箕子名胥
餘紂伐有蘇有蘇氏以妲己女焉妲己有寵其言是
從所好者貴之所憎者誅之使師延作朝歌北鄙之
音北里之舞靡靡之樂造鹿臺爲瓊室玉門其大三
里高千尺七年乃成厚賦稅以實鹿臺之錢盈鉅橋
之粟燎焚天下之財罷苦萬民之力收狗馬奇物充
仞宮室以人食獸廣沙丘苑臺以酒爲池縣肉爲林

通鑑外紀卷之二 商紀
三
使男女僕相逐其間宮中九市爲長夜之飲車行酒
騎行炙以繩羈人頭牽詣酒池醉而溺歿紂醉而忘
其日辰甲子問左右皆不知問於箕子箕子曰爲天
下主而一國失日天下其危乎一國不知而我獨知
之吾其危乎辭以亦醉而不知百姓怨望諸侯有畔
者妲己以爲罰輕誅薄威不立耳紂乃重刑辟爲梟
斗以火燒然使人舉輒爛其手不能勝紂怒乃更爲
銅柱以膏塗之加於炭火之上使有罪者緣之足滑
跌墜火中紂與妲己以爲大樂名曰炮烙之刑紂以
周諸侯昌及九侯鄂侯爲三公九侯入女于紂其女

不喜淫紂怒殺之而醢九侯鄂侯爭辨之并脯鄂侯

明堂位曰紂脯鬼侯以享諸侯呂氏春秋曰紂殺梅伯而醢之殺鬼侯而脯之以禮諸侯于廟楚辭曰梅

伯菹昌聞之竊歎崇侯虎以告且譖之曰昌積善累

德仁而善謀太子發勇而不疑中子旦恭儉而知時

若與競行則不堪其殃縱而舍之身必危亡冠雖弊

禮加頭履雖鮮位在足彼將不利于王請及其未成

形圖之紂囚昌于羑里昌為易卦辭乃申憤鬱厄作

歌曰殷道溷溷浸濁煩兮朱紫相合不別分兮迷亂

聲色信讒言兮炎炎之虐使我愆兮幽閉牢穽由其

言兮遘我四國憂勤勤兮太公望呂尚者東海上人

四岳伯夷之後姜姓呂氏夏商之時申呂或封枝庶子孫或爲庶人呂尚避亂隱遼東三十年行年七十屠牛朝歌賣食棘津遇七十餘主而不聽人人皆曰狂丈夫周昌將出獵史編卜之曰所獲非熊非羆非虎非豹兆得伯王之師昌齋三日田於渭之陽見呂尚坐茅而漁昌勞而問之曰子樂漁邪呂尚曰君子樂其志小人樂其事吾漁非樂之也昌與語大說曰自吾先君太公曰當有聖人適周周以興子真是邪吾太公望子久矣故號曰太公望立爲師或曰太公博聞嘗事紂紂無道去之游說諸侯無所遇歸周或

曰呂尚處士隱海濱釣於滋泉周昌之囚于姜里其
臣散宜生閔天南宮括患之而招呂尚初三子學于
呂尚尚知其賢酌酒切脯約爲朋友尚亦曰嗟乎西
伯賢君也而不能自濟由吾力不足而不能自舉也
四子見于姜里相與求有莘氏美女驪戎之文馬有
熊九駟西海之濱白狐林陵怪獸江淮大貝因紂之
嬖臣費中獻之散宜生趨而進曰西藩之臣昌之使
者敢效其實以備其辜紂大說曰西伯之忠於寡人
如是此一物足以釋西伯況其多乎昌長子伯邑考
質于殷爲紂御紂烹之爲羹賜昌曰聖人當不食其

子昌得而食之紂曰誰謂昌聖食其子尚不知昌之
囚七年諸侯皆從之囚紂懼而歸之曰譖昌者崇侯
虎也昌獻洛西之地赤壤之田方千里請除炮烙之
刑紂許之賜昌弓矢斧鉞因公季得專征伐爲西伯
典治南國江漢汝旁諸侯皇甫謐曰文王襲父爲西伯西伯歸乃
爲王門築靈臺列侍女撞鐘擊鼓待紂之失紂聞之
曰西伯改過易行吾無憂矣西伯治岐耕者九一仕
者世祿關市譏而不征澤梁無禁罪人不孥爲池沼
掘得死人之骨西伯曰葬之吏曰此無主矣西伯曰
有天下者天下之主有一國者一國之主寡人固其

主矣以衣棺更莖之天下聞之曰西伯澤及朽骨況
於人乎西伯問太公曰爲天下若何對曰王國富民
伯國富士僅存之國富大夫無道之國富倉府是謂
上溢而下漏西伯曰善對曰宿善不祥是日發倉府
以振鰥寡孤獨周有玉版紂令膠鬲索之西伯不與
費中以無道來求乃與之西伯問太公曰商王罪殺
不辜汝助予憂乎太公曰天道無殃不可以先唱人
道無災不可以先謀取天下若逐野獸得之皆有分
肉若同舟而濟舟敗皆同其害鷲鳥將擊卑身翕翼
猛獸將搏俛耳俯伏聖人將動必有愚色吾觀商野

草茅勝穀吾觀其羣衆曲勝直暴虐殘賊敗法亂刑
亡國之則也西伯問太公曰人主動作舉事有禍殃
之應鬼神之福乎太公曰人主重賦斂大宮室作臺
觀則人多病温霜露殺五穀絲麻不成人主好田獵
畢弋不避時禁則歲多大風禾穀不實人主好破壞
名山壅決名川則歲多大水人主好武事兵革不息
則日月薄食太白失行西伯曰誠哉乃與太公陰謀
行善修德以傾商政其事多兵權與奇計故後世之
言兵及陰謀皆宗本太公昔桀翳子大廉玄孫曰孟
戲中衍烏身人言般太戊卜使之御吉遂妻之其後

世有功佐殷故羸姓多顯遂爲諸侯其曾孫曰中湣
在西戎保西垂生蜚廉善走蜚廉生惡來革有力善
毀讒手裂虎兕父子俱以材力事紂紂用費中爲政
善諛好利殷人弗親諸侯益䟽多叛歸西伯西伯滋
大紂由是稍失權重爲黎之蒐東夷叛而克之虞芮
之君爭田久而不平相謂曰西伯仁人也盍往質焉
乃如周決平入其竟則耕者讓畔行者讓路入其邑
男女異路班白不提挈入其朝士讓爲大夫大夫讓
爲卿二國之君相謂曰此其君亦能讓天下而不居
矣吾所爭周人所耻吾等小人不可以履君子之庭

通鑑文系卷二 商紀
三
祇取辱耳遂相讓以其所爭田爲閒田而退天下聞
之歸者四十餘國諸侯曰西伯蓋受命之君自是西
伯更稱元年

劉恕曰無逸曰文王受命惟中身厥享國五十年
武成曰我文考文王誕膺天命以撫方夏惟九年
大統未集予小子其承厥志秦誓曰惟十有一年
武王伐殷惟十有三年春大會于孟津洪範曰武
王勝殷殺受立武庚以箕子歸惟十有三祀王訪
于箕子尚書大傳曰天之命文王非啍啍然有聲
音也文王在位而天下大服施政而物皆聽命聽

則行禁則止動搖而不逆天之道故曰天乃大命
文王文王受命一年斷虞芮之質二年伐邾三年
伐密須四年伐大夷五年伐耆六年伐崇七年而
崩史記亦以斷虞芮之訟爲受命之君明年伐大
戎明年伐密須明年敗耆國明年伐邾明年伐崇
侯虎明年西伯崩雖伐大戎伐耆伐邾之年與書
傳不次然同云西伯七年崩伏生司馬遷不見古
文尚書鄭玄專信讖候皆以文王受命七年而崩
孔安國治古學見武成篇故泰誓傳曰周自虞芮
質厥成諸侯並附以爲受命之年至九年文王卒

通鑑外紀卷二
劉歆作三統曆考上世帝王以爲文王受命九年
而崩賈逵馬融王肅韋昭皆同歆說皇甫謐帝王
世紀云文王卽位四十二年歲在鶉火更爲受命
之元年始稱王矣引周書文傳解曰文王受命九
年時惟莫春在鎬召太子發九年猶召太子明七
年未崩也五經緯候言受命者謂有黃龍玄龜白
魚赤雀負圖銜書以命人主易緯稱文王受命改
正朔布王號於天下其書皆出西漢之末瓊詭譎
怪不本經典故學者惑焉惟鄭玄依而用之大戴
禮曰文王十五而生武王禮記文王世子云文王

九十七而終武王九十三而終計文王之崩武王
八十三歲踰年改元至九十三適滿十年故知十
一十三非武王之年自文王受命而數之也後世
疑文王爲諸侯而輒改元案史記秦惠王十四年
更爲元年汲冢紀年魏惠成王三十六年改元稱
一年然則諸侯于其國各稱元年已之所稱中年
可改秦魏或有因于古也

西伯伐邠問太公吾用兵孰可太公曰密須氏疑于
可我先伐之管叔曰其君天下之明君伐之不義太
公曰先王伐逆不伐順伐險不伐易西伯曰善遂侵

阮祖共而伐密須密須之人自縛其君而歸西伯西

伯又伐犬夷帝王世紀曰文王受命四年周正月丙子朔昆夷伐周一日三至周之東門文

王閉門修德而不與戰勝黎伏生司馬遷作者祖伊恐奔告于紂紂曰

我生不有命在天是何能為祖伊反曰紂不可諫矣

劉恕曰世之賤者衆而貴者鮮愚者多而賢者少

物情艱於自知不遇則生怨懟故知者彊名曰命

以杜無妄之求中人安于擯棄俟時而不競蓋聖

人以此籠羣愚而息爭端也夫謂之命則有命之

者安可生而默定哉桀紂據禹湯之資不善守而

亾之民斯為下矣其能不曰命哉

西伯欲伐崇宣言曰崇侯虎蔑侮父兄不敬長老聽
獄不哀分財不均百姓力盡不得衣食余將征之乃
伐崇令無殺人無壞室無填井無伐樹木無動六畜
不如令者次無赦崇人三旬不降退修教而復伐之
因壘而降初西伯自岐徙鮮原鮮原在岐山之陽不出百里至是
作豐邑徙都豐豐在岐山東南三百餘里豐水之西分岐邦周召之地
為周公旦召公奭之采地天下三分其二歸周者太
公望之謀計居多散宜生曰殷可伐矣西伯弗許西
伯之九年西伯寢疾五日謂太子發曰見善而勿怠
時至而勿疑去非而勿處此三者道之所止也柔而

靜恭而敬屈而彊忍而剛此四者道之所起也太子

再拜受之西伯卒紂之三十年呂氏春秋曰文王立國四十一年韓嬰曰在位五十一

年九十七是為文王西伯正如太姒莘國之女號

曰文母旦夕勤勞以進婦道西伯治外文母治內有

賢妃之助焉太姒生十子長曰伯邑考次發次管叔

鮮次周公旦次蔡叔度次曹叔振鐸次邲叔武次霍

叔處次康叔封季曰聃季載皇甫謐曰文王生伯邑考次武王次管叔鮮次

蔡叔度次邲叔武次霍叔處次周公旦次曹叔惟發

旦賢仁孝異于羣子左右輔西伯故西伯舍伯邑考

而以發為太子又有滕叔繡及毛郃雍畢原豐郇八

國皆西伯子也太子發卽位是爲武王太公望爲師
周公旦輔翼用事召公畢公之徒爲左右伯夷叔齊
孤竹君之子也父欲立叔齊父卒叔齊讓伯夷伯夷
曰父命也叔齊亦不肯立俱逃去國人立其中子伯
夷叔齊聞西伯善養老往歸焉及至西伯已卒西伯
之十一年發除喪修父緒業上祭于畢東伐以觀諸
侯載西伯木主于車中以行自稱太子發言奉先君
東伐不敢自專師行伯夷叔齊叩馬諫曰父死不葬
爰及于戈可謂孝乎以臣弑君可謂仁乎左右欲兵
之太公曰此義人也扶而去之

呂氏春秋曰伯夷叔齊如周至岐陽則文

王已歿武王卽位使叔旦就膠鬲于次四內盟曰加
富三等就官一列又使召公就微子敬于共頭之下
盟曰世爲長侯守殷祭祀相奉桑林宜私孟諸皆爲
三書同辭血之以牲埋其一以一歸伯夷叔齊聞之
相視而笑曰禧異哉非吾所謂道也昔神農氏時祀
盡敬而不祈福其于人也忠信盡治而無求不以人
之壞自成不以人之卑自高今周見殷之僻亂而遠
爲之正與治上謀而行貨阻兵而保威割牲而盟以
爲信揚夢以說衆殺伐以要利以此紹殷是以亂易
暴也今天下聞周德衰與其並乎周以漫吾身不若
避之以絜吾行二子非師尚父左杖黃鉞右把白旄
行至首陽之山而餓焉

誓衆渡河至孟津叛殷從周不期而會者八百諸侯
皆曰紂可伐矣發曰汝未知天命乃還師歸紂淫亂
昏虐滋甚微子數諫度紂終不從欲歿之及去未能
自決問於太師疵少師強對曰國治身歿不恨爲歿

終不得治不如去箕子諫不聽人曰可以去矣箕子
曰知不用而言愚也殺身以彰君之惡不忠也為人
臣而自說于民吾不忍為也乃被髮佯狂為奴隱而
鼓琴以自悲故傳之曰箕子操紂囚之王子比干見
箕子為奴史記曰比干紂之親戚家語曰紂之諸父曰為大臣者主暴不
諫非忠也畏死而不以死爭則百姓何辜非勇也見
過即諫不用即死忠之至也諫三日不去紂怒曰吾
聞聖人心有七竅乃殺比干剖視其心剖比干妻以
視其胎微子曰父子有骨肉而臣主以義屬父有過
子三諫不聽則隨而號之人臣三諫不聽義可以去

矣太師少師抱持其祭樂器奔周周發問太公曰仁
賢已亡殷可伐乎太公曰先謀後事者昌先事後謀
者亡夏條可結冬冰可折難得而易失也紂在位以
來夷羊在牧梓化爲松大旱有燕口瓜俱旬天雨肉
雨土于亳河竭宮中鬼夜哭女子化爲丈夫山崩山
鳴兩日見天火燒宮大水大龜生毛兔生角紂嘗六
月獵於西土發民逐獸諫者曰長育之時不可逆天
道絕地德而行人賊君踐一日之苗而民失百日之
食紂殺之後數月天大暴風飄牛馬發屋折木飛揚
數十里有雀生鷓占曰以小生大國家王而名昌紂

介雀之德不脩國政亢暴無極外寇乃至朝臣莫救
周發見暘人蔭之于樾下左擁而右扇之天下懷其
德內史尚摯載其圖法出亡之周周發告諸侯曰商
王大亂沈于酒德避遠箕子爰近姑息與妲己為政
賞罰無方不用法式殺三不辜民大不服守法之臣

出奔周明年

周西伯之十三年
即武王元年己卯

周武王伐滅紂

在位三十

三年謚法殘義損善曰紂三統曆曰殷六百二十九
年左氏曰載祀六百鼎遷于周殷曆曰起丙戌終甲
申四百五十八年汲冢紀年
曰二十九王四百九十六年
湯之後分封以國為姓
有般氏來氏宋氏空桐氏稚氏北殷氏日夷氏

資治通鑑外紀卷第二終

南京圖書館
K. H. W. Library

資治通鑑外紀卷第三

宋 京兆萬年劉 恕 編集

周紀一

起武王元年巳卯至厲王四十年巳未二
百八十一年起共和元年上章潛灘盡上

章敦辨凡
七十一年

武王

元年即西伯之十三年巳卯春武王將伐紂問於太公
曰吾欲不戰而知勝不卜而知吉為之有道乎對曰
得衆人之心以圖不道則不戰而知勝矣以賢伐不
肖則不卜而知吉矣被害之我利之雖非吾民可得
而使也王問周公曰天下以殷為天子以周為諸侯

諸侯攻天子勝之有道乎周公曰攻禮者爲賊攻義者爲殘失其民者爲匹夫王攻失民者也何天子乎王曰善初武王使人候殷反報曰讒慝勝良王曰未也又往反報曰賢者出走矣王曰尚未也又往反報曰百姓不敢誹怨矣王曰嘻遽告太公太公曰刑勝故不敢誹怨其亂至矣武王將行卜戰龜焦不兆蒼立而折筮又不吉風雨暴至折蓋太公因其形而製曲蓋羣公盡懼太公曰枯骨朽著不踰人矣乃焚龜弃著帥衆先進武王從之徧告諸侯曰殷有重罪不可不伐行之日以兵忌東面而逆太歲魚辛諫曰歲

在北方不北征王不從至汜而汎王將度河陽侯之
波逆流而擊甚兩疾雷大風晦冥人馬不相見王瞑
目而撫之曰余任天下誰敢害吾意者於是風濟而
波罷大會誓于孟津前歌後舞次于河朔至懷而懷
至共頭而山墜霍叔懼曰三日而五災至無乃不可
乎周公曰剗比干而囚箕子蜚廉惡來知政惡有不
可遂選馬而進諸侯以兵會者車四千乘軍至鮪水
紂使膠鬲候周師見王問曰西伯將焉之王曰將之
殷膠鬲曰何日至王曰甲子日膠鬲去而兩甚皆曰
卒病請休王曰吾已令膠鬲以甲子報其主矣不可

不救其死也遂行王韃係解五人御於前曰臣所以
事君非爲係韃也王乃釋旄鉞而係之甲子至商郊
紂發兵拒之于牧野師尚父與百夫致師以大卒馳
紂紂師雖衆皆欲武王亟入無戰心倒戈以開武王
武王以戎車虎賁馳之商師大崩紂走反入宣室衣
其珠玉衣赴火死武王持大白旗以麾諸侯諸侯畢
拜武王揖諸侯從入商國商國百姓咸待于郊觀周
軍之入見畢公至殷民曰是吾新君也商容曰非也
視其爲人嚴乎將有急色故君子臨事而懼見太公
至民曰是吾新君也容曰視其爲人虎據而鷹趾當

敵將衆威怒自倍見利卽前不顧其後故君子臨衆
果於進退見周公至民曰是吾新君也容曰視其爲
人忻忻休休志在除賊是非天子周之相國也故聖
人臨衆知之見武王至民曰是吾新君也容曰然聖
人爲海內討惡見惡不怒見善不喜顏色相副是以
知之商人皆再拜稽首武王亦答拜入至紂歿所王
自射之三發而后下車以輕劍擊之以黃鉞斬紂頭
懸大白之旗親射惡來之口紂之嬖妾二女皆自殺
又射三發擊以劍斬以玄鉞懸其頭小白之旗武王
上殷堂見王入室見女皆取而歸之武王乃出復軍

皇皇若天下之未定問太公曰奈殷之士衆何對曰
愛其人者兼屋上之烏憎其人者盡其胥餘咸劉厥
敵使靡有餘王曰不可問於召公對曰有罪者殺之
無罪者生之王曰不可問於周公對曰使各安其居
田其田無變舊新唯仁是親王曰善哉其明日除道
及商紂宮柴於上帝祈於社朝成湯之廟乃出設奠
於牧室以王瑞自太王興故追王太王王季文王祀
先公以天子之禮不以卑臨尊也改建子爲正月以
垂三統至於敬授民時巡狩祭享猶用夏焉尚赤其
社用栗葬樹栢牲用騂以赤爲徽號朝燕服冕而玄

衣八寸爲尺其樂大武王踐祚三日師尚父道丹書
之言曰敬勝怠者吉怠勝敬者滅義勝欲者從欲勝
義者凶凡事不彊則枉弗敬則不正枉者滅廢敬者
萬世藏之約行之恒可以爲子孫常以仁得之以仁
守之其量百世以仁得之以不仁守之其量十世以
不仁得之以不仁守之必傾其世王聞書之言惕若
恐懼退而爲戒書於席之四端及機鑑盥盤楹杖帶
履屨觴豆戶牖劔弓矛皆爲銘焉王命周公進殷之
遺老而問殷之亡故又問衆之所說民之所欲對曰
欲復盤庚之政王從之親殷如周視人如已破鼓折

枹弛弓絕弦去舍露宿以示平易解劔帶笏以示無
仇天下美其德萬民說其義歌謠而樂之微子持其
祭器造於軍門面縛銜璧輿襯王親釋其縛受其璧
而赦之焚其櫬禮而命之使復其位王得二虜問之
曰若國有妖乎一虜曰晝見星天雨血雨灰雨石大
如甕六月雨雪此妖也一虜曰殷有大妖此不與也
子不聽父弟不聽兄君令不行殷君喜刑殺割人心
以人餒虎以信爲欺欺者爲忠忠者爲不忠阿諛者
賞女子爲政君子爲下小人爲上急令暴取萬民愁
苦田獵畢弋走狗試馬不避風雨寒暑好治宮室修

池臺大宮百里者七十三所坐起以金鼓無長幼貴
賤之序無禮義忠信無斗尺權衡此妖之大者也王
貴其言避席再拜之武王欲築宮於五行山周公曰
不可固塞險阻之地使我德能覆之則天下納貢職
者回也使我有暴亂之行則天下之伐我難矣王分
殷畿內為三國封紂子武庚祿父為諸侯續殷祀以
殷初定未集恐武庚作亂命管叔尹鄘蔡叔尹衛相
祿父居邶治殷餘民謂之三監詩譜曰庶殷頑民彼紂化日久未可以建
諸侯乃三分其地置三監使命召公釋箕子之囚畢
管叔蔡叔霍叔尹而教之公釋百姓之囚表商容之間商容賢者為百姓所愛

紂廢之商容執羽籥憑於馬徒欲伐紂而不能遂去
伏於太行山王以爲三公商容曰吾嘗欲伐紂而不
能愚也不爭而隱無勇也愚而無勇不足以備三公
固辭不受命南宮括散鹿臺之錢發鉅橋之粟分財
棄責以振窮困顯賢者之位歸傾宮之女南宮伯達
史佚展九鼎寶玉閎夭封比干之墓殷民咸喜曰王
之於人仁賢也死者猶封其墓况生者乎亡者猶表
其間况存者乎王之於財也聚者猶散之肯復藉乎
王之於色也在者猶歸其父母肯復徵乎惡來父蜚
廉爲紂作石椁於北方還無所報死葬霍太山王已

平殷亂天下宗周而伯夷叔齊耻之義不食周粟隱
於首陽山采薇而食之作歌曰登彼西山兮采其薇
矣以暴易暴兮不知其非矣神農虞夏忽焉沒兮我
安適歸矣于嗟徂兮命之衰矣遂餓歿於首陽山

劉恕曰易稱湯武革命順乎天而應乎人孔子曰
伯夷叔齊求仁而得仁又誰怨二者意殊志矣聖
人並稱之蓋言湯武所以懼後世之爲人君者舉
夷齊所以戒後世之爲人臣者道悖而同歸於教
雖萬世無弊焉

王罷兵西歸四月至豐薦俘馘于太室封神農之後

通鑑外紀卷三 周紀一 六
於焦黃帝之後於薊堯之後於祝舜之後自夏時或
失或續虞闕父爲周陶正事王王賴其利器用與其
神明之後以元女大姬配其子胡公滿封於太皞之
墟都宛丘之側是曰陳與黃帝堯後備三恪以舜爲
庶人時居媯水乃賜胡公姓媯夏禹之後殷時或絕
或封得其苗裔東樓公封之於杞封功臣謀士以師
尚父爲首封封於營丘曰齊周公於少皞之墟曲阜
曰魯召公奭於北燕畢公高於畢弟叔鮮於管叔度
於蔡叔振鐸於曹叔武於邾叔處於霍康叔封聃季
載皆少未封兼制天下立七十一國封兄弟之國十

五人姬姓之國四十人周之子孫不狂惑者皆為諸

侯

皇甫謐曰武王伐紂之年夏四月乙卯祀于周廟將帥之士皆封諸侯國四百人

王親虛

已問箕子殷所以亡曰吾殺紂是與非與箕子不忍言殷惡而殺之是王亦醜之問以天道作洪範封箕子於朝鮮而不臣也餘各以次受封班賜宗彝分殷之器物於諸侯惟周公留周佐王畢公之後以國為氏久之絕封為庶人在中國或夷狄箕子至朝鮮教以禮義田蠶制八條之教相殺者以當時償殺相傷者以穀償相盜者男没入為其家奴女子為婢欲自贖者人五十萬其婦人貞信無門戶之閉而人不為

盜初吳太伯卒無子弟仲雍立斷髮文身羸以爲飾
仲雍卒子季簡立卒子叔達立卒子周章立王求太
伯仲雍之後得周章已君吳因而封之別封周章弟
仲雍之庶孫虞仲於周之北故夏虛爲西吳後世謂
之虞周公問太公何以治齊曰尊賢而尚功周公曰
後世必有篡弑之臣太公問周公何以治魯周公曰
尊尊而親親太公曰後世寢弱矣太公東就國道宿
行遲聞逆旅人曰時難得而易失客寢甚安殆非就
國者太公夜衣而行犁明至國周初定未能集遠方
營丘邊萊夷萊侯來伐爭營丘太公至國辟草萊而

居焉脩道術尊賢知賞有功東海上有居士狂鬪華
士昆弟二人議曰吾不臣天子不友諸侯耕而食之
掘而飲之無求於人無上之名無君之祿不仕而事
力太公執而殺之周公急傳而問曰二子賢者殺之
何也太公曰是昆弟議曰不臣天子是望不得而臣
也不友諸侯是望不得而使也耕而食之掘而飲之
無求於人是望不得賞罰勸禁也夫王者使臣非爵
祿則刑罰也今四者不足以使之望誰爲君乎是以
誅也太公以齊地負海瀉鹵少五穀而人民寡迺勸
女工極技巧通工商之業便魚鹽之利民多歸之故

齊冠帶衣履天下海岱之間歛袂而朝焉王謂周公曰自洛汭延于伊汭居易無固其有夏之居我南望三塗北望嶽鄙顧詹有河與詹伊洛毋遠天室營周居于洛邑縱馬于華山之陽放牛于桃林之虛偃干戈振兵釋旅釁鼓旗甲兵藏之府庫示天下不復用王通道于九夷八蠻各以其方賄來貢使無忘職業肅慎氏貢楛矢石砮其長尺有咫王欲昭其令德之致遠以示後人使永監焉故銘其楛曰肅慎氏之貢矢分同姓以珍玉展親也分異姓以遠方之職貢使無忘服也

二年王有疾弗豫

金縢曰既克商二年王有疾孔傳曰伐紂明年也

羣臣懼

太公召公穆卜周公乃被齊自為質告太王王季文王欲代武王占之曰吉周公納冊于金縢之匱中明日王有瘳箕子嘗朝周過故殷虛感宮室毀壞生禾黍箕子傷之欲哭則不可俯泣則為其近婦人乃作麥秀之詩曰麥秀漸漸兮禾黍油油彼狡僮兮不與我好兮狡僮謂紂也殷民間之皆流涕武王遷都鎬而文王之廟在豐皇甫謐曰鎬在長安南二十里豐水之東王崩在位七年年九十三太子誦立是為成王周人禘饗而郊稷祖文王而宗武王高圉大王能帥稷者也故報焉

成王

元年丙戌周公居冢宰以王年少恐天下畔乃踐阼攝

政代王當國南面倍依以朝諸侯葬武王于畢成王

冠禮傳天子之年近則十二遠則十五必冠譙周五

武王以庚辰歲崩周公以壬午歲出居東癸未歲返

譙周與皇甫謐諸儒言武王成王年皆不同故云庚

辰武王崩也許慎五經異義曰周公居東歲大風王

與大夫冠弁開金滕之書成王年十四喪冠也諸儒

之說前後附會不足為據書金滕云周公居東二年

秋王與大夫盡弁以啓金滕之書則巳冠矣其年則

不可知先儒云成王十五而周公命史雍曰辭達而

冠或言十四十六皆無所出周公命史雍曰辭達而

勿多也史雍頌曰近於民遠於佞近於義嗇於時惠

於財任賢使能朝於祖以見諸侯管叔蔡叔霍叔流

言於國曰公將不利於孺子奄君謂武庚祿父曰此
百世之時也請舉事祿父從之周公告太公召公曰
大王王季文王之憂勞天下久矣於今而後成我所
以攝行政者恐天下畔周無以告我先王也管蔡果
挾武庚率奄淮夷叛周公奉王命興師東伐使召公
命齊太公曰東至海西至河南南至穆陵北至無棣五
侯九伯實得征之齊由此得征伐爲大國

二年周公居東罪人斯得誅武庚管叔放蔡叔與之

車七乘徒七十人降霍叔于庶人三年不齒

周書作洛解曰

管叔霍叔縊而卒

遂定奄及淮夷東土以寧諸侯復

囚蔡叔于郭鄰

周記一成王

宗周象為虐于東夷周公以師逐之至于江南為三
 象以嘉其德分殷餘民為二其一封微子啓於陶唐
 氏火正闕伯之墟商丘為宋以奉殷祀得用先王禮
 樂於周為客天子有事膳焉有喪拜焉微子仁賢殷
 民甚戴愛之

三年周公歸自東征

鄭玄曰周公避居之初是武王崩後三年成王年十三也居東

二年罪人斯得成王年十四也迎周公反而居攝成
 王年十五也七年致政王年二十一也故金縢注云
 文王十五生武王九十七而終終時武王八十三矣
 於文王受命為七年後六年伐紂後二年有疾瘳後
 二年崩崩時年九十三年矣周公以武王崩後三年出
 五年秋反而居攝四年作康誥五年作召誥七年作
 洛誥伐紂至此十六年也作康誥時成王年十八洛
 誥時年二十一也即政時年二十二然則成王以文

王終明年生也王肅金勝注云文王十五而生武王
九十七而終時受命九年武王八十三矣十三年伐
紂明年有疾時年八十八矣九十三而崩以冬十二
月其明年稱元年周公攝政遭流言作大誥而東征
二年克殷殺管叔三年而歸制禮作樂出入四年至
六年而成七年營洛邑作康誥召誥洛誥致政成王
然則文王崩之年成王已三歲武王八十一而生成
王武王崩時成王已十三周公攝政七年而致政成
王年二十也明年
即政年二十一也

四年周公以殷餘民之一封康叔封於衛居河淇間
故商虛周公懼康叔齒少申告之曰必求殷之賢人
君子長者問其先殷所以興所以亾而務愛民告以
紂所以亾者以淫于酒酒之失婦人是用紂之亂自
此始為梓材示君子可法則故作康誥酒誥梓材以

命之康叔之國既以此命能和集其民民大說康誥曰成

王既伐管叔蔡叔以殷餘民封康叔惟三月哉生魄

孔傳云周公攝政七年三月也孔亦無明據蓋以洛

誥云在十有二月惟周公誕保文武受命惟七年而

康誥云周公初基作新大邑于東國洛故以為七年

尚書微子之命後即歸禾嘉禾序乃至洛誥自二年

周公居東罪人斯得踰五年乃封康叔于事大緩武

王時即營周居洛邑此云作新大邑不必七年也尚

書大傳叙周公居攝曰一年救亂二年克殷三年踐

奄四年建侯于衛五年營成周六年制禮作樂七年

致政成王此言雖不可全信然與克殷踐奄相連故

從其後亦封季弟季載於聃初武王后齊太公之女

曰邑姜方震大叔夢帝謂已余命而子曰虞將與之
唐屬諸參而蕃育其子孫及生有文在其手曰虞遂
以命之字曰子干未幾唐有亂周公誅滅之成王削

桐葉爲珪與弟大叔虞戲曰以此封若史佚請擇日
王曰吾與之戲耳史佚曰天子無戲言言則史書之
禮成之樂歌之遂封大叔虞於河汾之東方百里堯
之故虛曰唐侯又有邗應韓三國皆武王子也周公
遣使者出舉遠方之民有飢寒不得衣食者獄訟失
職者賢才不舉者以告周公周公於其君之朝也揖
而問之其君歸召其國大夫告以周公之言百姓聞
之皆喜曰何居之深遠而見我之明也豈可欺哉
六年周公朝諸侯於明堂制禮作樂頒度量而天下
大服周公作樂曰勺言能勺先祖之道也交趾南有

越裳氏重譯而獻白雉曰道路悠遠山川阻深恐一使不通故重三譯而來朝周公曰德澤不加君子不饗其質政令不施君子不臣其人譯曰吾受命吾國之黃耆曰天之無烈風淫雨海不揚波三年矣意者中國有聖人乎盍往朝之周公歸之於王稱先王神致薦于宗廟使者迷其歸路周公錫以駟車五乘皆爲司南之制越裳使者載之由扶南林邑海際碁年而至其國故指南車常爲先導示服遠人而正四方七年初武王作邑於鎬京謂之宗周是爲西都至是成王欲如武王之志定鼎于郊鄠卜世三十卜年七

百

劉恕曰左傳曰殷載祀六百商周相接舊史所記蓋得其詳殷年過於夏不得不謂周踰於殷也七百年間約計前代三十世矣而後世謂左傳在周未亾之前逆知享國之年時之興廢專歸於術捨弃德政不亦野哉汲冢紀年西周二百五十七年通東周適合七百之數而三統曆西周三百五十二年并東周八百餘年既演百年乃曰周過其曆是前後錯謬不可得彊通者也

二月使召公先相宅三月周公至洛師復卜申視營

築謂之王城是爲東都方千七百二十丈郭方十七里南繫于洛水北因于郊山以爲天下之濶制郊甸方六百里因西土爲方千里分爲百縣縣有四郡郡有鄙曰此天下之中四方入貢道均周公又營成周成王居洛邑遷殷頑民於成周復還歸西都成王長能聽政十二月周公反政初周公避流言之難居東思公劉太王居豳之職憂念民事至苦之功以比序已志後成王迎之攝政致太平其出入也一德不回純似公劉太王之所爲太師述其志主意于豳公之事故別其詩爲豳國變風焉

元年

癸巳

正月朔成王臨朝周公北面就臣位

孔子曰昔者周公事文王行無專制事無由已身若不勝衣言若不出口奉持於前洞洞焉若將失之可謂能子矣武王崩成王幼周公承文武之業履天子之位聽天下之政征夷狄之亂誅管蔡之罪負扈而朝諸侯誅賞制斷無所顧問威動天地聲懾海內可謂能武矣成王旣壯周公致政北面而臣事之請而後爲復而後行無擅恣之志無矜伐之色可謂能臣矣一人之身而三變者應時也周公留相成王使其子伯禽就封于魯周公問伯禽于其傅對曰其爲人

寬而好自用以慎周公曰嗚呼以人惡爲美德乎彼其寬也出無辨矣君子力如牛不與牛爭力走如馬不與馬爭走知如士不與士爭知彼爭者鈞之氣也其好自用所以窶小也不察不聞卽物少至少至則淺淺者賤人之道也彼其慎所以淺也我文王之子武王之弟今王之叔父于天下不賤矣然吾執贄而見者十人還贄而相見者三十人貌執之士百有餘人欲言而請畢事者千有餘人僅得三士焉人皆以我爲越踰好士故士至汝無教之以魯國驕人仰祿之士猶可驕也正身之士不可驕也周公謂伯禽曰

吾聞德行寬裕守之以恭者榮土地廣大守之以儉
者安祿位尊盛守之以卑者貴人衆兵彊守之以畏
者勝聰明狗知守之以愚者善博聞彊記守之以淺
者益六者謙德利而勿利也成王告伯禽曰爾知爲
人上之道乎凡處尊位必以敬下諫者勿振以威毋
格其言有文無武無以威下有武無文民畏不親文
武俱行威德乃成清白上通巧佞下塞伯禽再拜受
命而辭伯禽至曲阜淮夷徐戎並興東郊不開伯禽
帥師伐之成王東伐淮夷遂踐奄魯亦平徐夷王大
蒐於岐山之陽初太子封齊五月而報政周公曰何

疾也曰吾簡其君臣禮從其俗及伯禽封魯三年而
 報政周公曰何遲也伯禽曰變其俗革其禮喪三年
 然後除之周公嘆曰嗚呼後世其北面事齊矣夫政
 不簡不易民不能近平易近民民必歸之虞夏商之
 幣金為三品或黃或白或赤或錢或布或刀或龜貝
 周制以商通貨以賈易物太公立九府圜法周官有太府玉
府內府外府泉府天府府職內職幣職金皆掌財幣之官故曰九府圜謂均而通也黃金方寸
 而重一斤錢圜函方輕重以銖布帛廣二尺二寸為
 幅長四丈為匹故貨寶於金利於刀流於泉布於布
 束於帛太師太公望卒年百有餘歲莖鎬京陪文武

通鑑外紀

之墓子丁公伋立周公為太師召公為太保畢公為太傅召公以周公嘗攝王政不宜留在王朝復列臣

職其意不說周公陳已意作君奭以告之

史記燕世家云成王

既幼周公攝政當國踐阼召公疑之作君奭今案此篇是周公歸政言留輔成王之意司馬遷妄說耳

伯禽嘗與康叔朝于成王見周公三見而三笞康叔有駭色與伯禽問於商子商子曰南山之陽有木曰喬二子盍往觀乎見喬踈焉實而仰商子曰喬者父道也南山之陰有木名梓二子盍往觀乎見梓勃焉實而俯商子曰梓者子道也二子明日見周公入門而趨登堂而跪周公拂其首勞而食之曰安見對曰

見商子周公曰君子哉衛康叔聃季載皆有馴行周公言於王舉康叔爲司寇賜寶祭器以章有德季載爲周司空治皆有令名於天下餘五叔無官初降霍叔後三年復其舊封蔡叔度旣遷而死其子曰胡改行率德馴善周公舉胡爲已卿士言於王復封胡於蔡徙居新蔡奉蔡叔之祀是爲蔡仲周公曰不如吾者不與處累我也與我齊者不與處無益我也惟賢於已者可與處也周公歸政三年之後老于豐事文王之廟將沒曰塋我成周示天下臣於王也公卒

應劭

曰周公年九十九

謚文公成王葬于畢從文王之墓以明予

小子不敢臣周公也命魯世世祀周公以天子禮樂
賜之重祭外則郊社內則大嘗禘升歌清廟下而管
象朱干玉戚冕而舞大武八佾以舞大夏虞夏殷周
四代之樂器服官魯兼用之昭文王周公之德以示
子孫凡蔣邢茅胙祭六國皆周公之胤也初鬻熊生
熊麗熊麗生熊狂熊狂生熊繹王舉文武勤勞之後
嗣封熊繹以子男之田於楚蠻姓芊居丹陽成王問
於尹佚曰何德而民親其上對曰使之以時而敬順
之忠而愛之布令信而不食言如臨深淵如履薄冰
王曰懼哉對曰天地之間四海之內善之則畜不善

則讐也夏殷之臣讐桀紂而臣湯武若何其不懼也

成王之時咸陽雨金

末年四月甲子王疾大漸懼太子釗之不任召太保

奭芮伯彤伯畢公衛侯毛公帥百官相太子而立之

王肅曰彤伯姒姓之國其餘五國姬姓毛公文王庶子乙丑王崩在位三十年通周公攝政

三十七年鄭玄曰成王二十八年崩二公以太子見先王廟申告以文

王武王為王業之不易務在節儉毋多欲以篤信臨

之是為康王

康王元年癸亥十二年六月庚午王命畢公保釐成周初

召公治西方甚得民和有司請召民召公曰不勞一

身而勞百姓非吾先君文王之志也乃巡行鄉邑聽

斷於阡陌隴畝之間廬於棠樹下以桑蠶耕種時弛

獄出拘民得反業自侯伯至庶人無失職者及召公

卒謚康公民思其政懷棠樹不敢伐作甘棠之詩歌

詠之王充曰召公周公之兄年百八十歲魯侯伯禽晉侯燮齊侯伋衛

康伯牟楚子熊繹並事康王唐國之南有晉水故燮

改爲晉侯魯侯伯禽之四十六年康王十六年卒子考公

酋立四年康王二十年卒弟煬公熙立築茅闕門徙魯康

王朝諸侯於鄆宮成康之際天下安寧刑錯四十餘

年不用王崩在位二十六年子昭王瑕立案三統曆自周昭王以下

通鑑紀事本末卷三十一 周紀一 康王

亡年數據據魯侯年為紀

昭王元年王道微缺德衰有光五色貫紫微井水溢

王南巡狩反濟漢漢濱之人以膠膠舡王至中流膠

液舡解王及祭公溺焉呂氏春秋曰昭王親將征荆蠻辛餘靡長且多力為王右

還反涉漢梁敗王及祭公隕于漢辛餘靡振王北濟反振蔡公周公乃侯之于西翟實為長公其崩

不赴告諱之也在位五十年子穆王滿立

穆王元年即位春秋已五十矣孔安國曰穆王即位過四十矣魯煬

公六十年穆王三年卒子幽公宰立十四年穆王十七年弟蒞

弒公自立是為微公王寵盛姬為之築重壁之臺盛

姬盛伯子也徐夷作亂帥九夷以伐宗周西至河上

漢

穆王畏其方熾乃分東方諸侯命徐子主之徐子嬴
姓處潢池東地方五百里行仁義通溝陳蔡之間欲

舟行上國得朱弓朱矢以爲天瑞自號偃王

尸子曰徐偃王

有筋而無骨

陸地而朝者三十六國昔蜚廉子惡來弟曰

季勝生孟增幸於成王是爲宅臯狼生衡父衡父生

造父以善御習馬幸於穆王得驥之乘匹桃林温驪

驊騮耳之駟王使造父御西巡狩樂而忘歸聞徐

子僭號穆王日馳千里馬長驅歸周以救亂使造父

告楚令伐徐王孫厲謂楚子曰徐君好行仁義君若

不伐楚必事徐楚子曰若信有道不可伐也對曰大

之伐小彊之伐弱猶石之投卵虎之啗豚也惡有其
理楚子大舉兵伐徐徐子愛民無權不忍鬪故敗乃
北走彭城東山下百姓隨之者以萬數因名其山為

徐山徐子將死曰吾賴於文德而不明武備故至於

此劉向云王孫厲勸楚文王伐徐偃王案穆王西周之王楚文

王乃在東周莊王八年即位相去僅三百年蓋穆王

乃以趙城封造父其族由此為趙氏王將征犬戎祭

公謀父諫曰先王非務武也勤恤民隱而除其害自

大畢伯士之終犬戎氏以其職來王天子曰予必以

不享征之無乃廢先王之訓而王幾頓乎王不聽遂

徐山

征之獲其五王四白鹿四白狼王遂遷戎于太原自

是荒服者不至王享國百年耄荒諸侯有不睦者南

侯言於王修刑辟命曰甫刑王起六師至于九江伐

楚汲冢紀年曰會諸侯於塗山王崩在位五年子共王

繁扈立

共王元年游於涇上密康公從有三女奔之其母曰

必致之於王夫女三為粲美之物也眾以美物歸汝

而何德以堪之小醜備物終必亡康公不獻一年王

滅密王能庇昭穆之闕崩謚曰共在位十年皇甫謚曰在位二十五年

年八子懿王躋立十四

懿王元年乙酉王室遂衰詩人作刺鄭玄曰懿王烹齊哀公今齊風有刺哀公

詩王嘗居犬丘皇甫謐曰犬丘與鎬相近有離宮懿王暫居非徙都也魯微公

五十年懿王二年卒子厲公擢立王崩在位二十五年皇甫謐曰在位二十

五十年共王弟孝王辟方立

孝王元年庚戌是時七年大雹牛馬歿江漢俱凍昔惡來革

子曰女防女防生旁皐旁皐生太几太几生大駱大

駱生非子以造父之寵皆蒙趙城姓趙氏非子居犬

丘好馬及畜善養息之孝王召使主馬沂渭之間馬

蕃息王欲以為大駱適嗣申侯謂王曰昔我先酈山

之女為戎胥軒妻生中濬以親故歸周保西垂西垂

河

和睦今我復妻大駱生適子成申駱重婚西戎皆服
所以為王王其圖之王曰昔栢翳為舜主畜畜多息
故有土賜姓今後世亦為朕息馬朕其分土為附庸
邑之秦別居槐里使復續嬴氏祀號曰秦嬴遂不廢
大駱適子成以和西戎魯厲公三十七年孝王十四年卒

弟獻公具立王崩在位十五年懿王子夷王燮立

夷王元年乙丑覲禮王始下堂而見諸侯荒服不朝命虢

公帥六師伐太原之戎至於俞泉獲馬千匹初楚子

熊繹生熊艾熊艾生熊黜熊黜生熊勝熊勝以弟熊

楊為後孔晁曰熊繹玄孫熊摯有疾楚人廢之立其弟熊延熊摯自奔於夔子孫有功王命為夔

子熊楊生熊渠是時諸侯或不朝相伐熊渠甚得江漢間民和乃興兵伐庸揚粵至于鄂熊渠曰我蠻夷也不與中國之號謚立其長子毋康為句亶王中子摯紅為鄂王少子執鹿為越章王皆在江上楚蠻之地熊渠嘗夜行見寢石以為伏虎彎弓射之滅金飲羽下視知石也復射之矢摧無迹王崩

在位十五年 年六十五

厲王胡立

厲王元年庚辰暴虐楚熊渠畏其伐去三子王號初衛

康叔卒子康伯牟立卒子孝伯立卒子嗣伯立卒子

康伯立卒子靖伯立卒子貞伯立卒子頃公立頃公

齊

元年魯獻公之三十二年也

厲王十六年

頃公厚賂周周

命衛為侯

衛世家云頃侯厚賂周夷王夷王命衛為侯非也

頃公之時仁人

不遇小人在側衛之變風始作

曹叔振鐸卒子太

伯脾立卒子仲君平立卒子宮伯侯立卒子孝伯雲

立卒子夷伯喜立燕自召公奭九世至惠侯曹夷

伯及燕惠侯元年魯獻公之三十四年也

厲王十八年

蔡仲卒子蔡伯荒立卒子宮侯立卒子厲侯立卒子

武侯立武侯元年魯獻公之三十五年也

厲王十九年

齊丁公呂伋卒子乙公得立卒子癸公慈母立卒子

哀公不辰立荒淫怠慢好田獵政衰齊之變風始作

紀侯譖哀公於周周烹之

鄭玄詩譜序曰懿王受譖烹齊哀公公羊傳及史記

齊世家皆云周烹哀公而不言何王鄭據本紀稱懿王之時詩人作刺謚法保民者艾曰胡故知胡公壽

考自懿王歷孝夷厲始被殺齊變風始於哀公則懿王時也鄭亦無明文蓋約其事而言耳徐廣見史記

云夷王時獻公殺胡公故而立其弟靜是為胡公徙傳會而言夷王烹哀公

都薄姑紀姜姓侯爵或云子爵哀公同母弟山怨胡

公與其黨帥營丘人襲胡公騶馬繻以胡公入貝水

而殺之山自立是為獻公齊世家周夷王時山殺胡公自立是為獻公九年卒

子武公立武公九年厲王出奔彘是時周雖未見年厲王四年王益嚴三年王出奔彘是時周雖未見年厲王

在位必踰十八年獻公獻公元年復都臨菑魯獻公安得以夷王時即位哉

之三十九年也厲王二十三年宋微子啓卒子微仲衍立

齊

禮記檀弓曰微子舍其孫膺而立衍鄭云曰微子適子死立其弟衍殷禮也而宋世家誤以衍為微子之

弟卒子宋公稽立卒子丁公申立卒子湣公共立卒

弟煬公熙立湣公子鮒祀曰我當立弑煬公而自立

是為厲公卒子釐公舉立晉侯燮卒子武侯寧族

立卒子成侯服人立自唐徙都曲沃卒子厲侯福立

卒子靖侯宜臼立宋釐公及晉靖侯元年魯獻公之

四十年也厲王二十四年秦嬴非子卒子秦侯立秦侯元

年魯獻公之四十一年也厲王二十五年陳胡公滿卒子

申公犀侯立卒弟相公臯羊立卒申公子孝公突立

卒子慎公圉戎立卒子幽公寧立幽公元年魯獻公

通鑑廿七卷三周紀一厲王

通鑑外紀卷三十一 厲王二
之四十四年也

厲王二十八年

幽公淫荒昏亂游蕩無度國

人傷而刺之陳之變風作矣

魯獻公五十年卒

厲王

三十四年子慎公執立

魯世家曰獻公三十三年卒子真公湣立皇甫謐曰獻公立三十六

年

楚熊渠卒子熊摯紅立卒弟熊延弒而代立卒

子熊勇立熊勇元年魯慎公之元年也

厲王三十五年

自是

衛曹燕蔡齊宋晉秦陳楚之年始可紀厲王無道淮

夷入寇王命虢仲征之不克王好利說榮夷公大夫

芮良夫諫曰夫利百物之所生也天地之所載也而

或專之其害多矣匹夫專利猶謂之盜王而行之其

歸鮮矣榮公若用周必敗既榮公為卿士諸侯不享

宣王

詩之變雅始作王行侈傲國人謗王召公告曰民不堪命矣王怒得衛巫使監謗者以告則殺之國人莫敢言道路以目王喜告召公曰吾能弭謗矣召公曰是障之也夫民慮之於心而宣之於口成而行之胡可壅也今王塞下之口而遂上之過恐為社稷憂王不聽於是國莫敢出言王心疾虐萬民弗忍三年乃相與畔襲王王出奔彘史記本紀厲王三十年好利近榮夷公三十四年王益嚴國人莫敢言三年王奔彘案史記厲王以前皆無年好利非一年之事三十年王殺謗者三十四年始道路以目事不相接王子靜匿召公之宮國人圍之召國語無年今從之

公曰昔吾驟諫王王不從是以及此難今殺王子王

其以我為懟而怒乎乃以其子代王子召公周公二

相行政號曰共和厲王在位四十年韋昭曰彘之亂公卿相與和而修政事號曰共和

汲冢紀年及魯連子曰共國之伯名和行天子政與

史記不同案自武王元年巳卯至厲王四十年巳未

二百八十年自共和元年庚申至幽王十一年庚

午七十一年共三百五十二年為西周汲冢紀年曰

自武王至幽王二百五十七年史記魯世家無伯禽

在位之年獻公三十二年卒三統曆云五十年故共

和元年當慎公之七年史記獻公既少十八年則共

和元年合當真公二十年而十二諸侯年表共和

元年當真公十五年或云獻公四十二年誤作三十

二年或伯禽無年故移易不定三統曆武公在位二

亂滅秦犬丘大駱之族

共和

開

元年晉靖侯薨子釐侯司徒立釐侯甚嗇愛物儉不
中禮國人閔之唐之變風始作

四年蔡武侯薨子夷侯立 楚熊勇薨弟熊嚴立

七年曹夷伯薨弟幽伯強立

十年陳幽公薨子釐公孝立

十一年宋釐公薨子惠公觀立

十四年厲王崩于彘太子靜長於召公家二相共立

之是為宣王 大旱 楚熊嚴有子四人曰伯霜仲

雪叔熊季紉熊嚴薨伯霜立是為熊霜

宣王

元年召公周公輔王修政法文武成康之遺風王命
 召公伐平淮夷申伯仲山甫順天下存失理喻德教
 舉遺士海內翕然向風諸侯復宗周尹吉甫作詩美
 之 王不籍千畝號文公諫曰民之大事在農故稷
 為大官今欲修先王之緒而弃其大功匱神乏祀困
 民之財將何以求福用民王不聽 燕惠侯薨子釐
 侯莊立 王以秦仲為大夫討西戎始有車馬禮樂
 侍御之好國人美之秦之變風始作 天下大旱
 二年曹幽伯弟蘇弒幽伯而代立是為戴伯
 三年齊武公薨子厲公無忌立

齊
 比

五年晉釐侯薨子獻侯籍立

六年西戎殺秦仲王召其子五人與兵七千人使伐西戎破之王予其長子莊公父秦仲及其先大駱犬丘地卽大駱舊居爲西垂大夫戎由是少却 楚熊霜薨三弟爭立仲雪歿叔熊逃難於濮季紉立是爲熊紉濮南夷也 自二年不雨至於是歲

十年魯慎公薨弟武公敖立

十二年春魯武公與子括戲朝王王愛戲欲立爲魯太子樊仲山父諫曰廢長立少不順不順必犯犯王命必誅今天子立諸侯而建其少是教逆也若魯從

之而諸侯効之王命將有所壅若不從而誅之是自
誅王命也是事也誅亦失不誅亦失天子其圖之王
卒立之夏武公歸而薨戲立是爲懿公 齊厲公暴
虐齊人欲立故胡公子乃攻殺厲公胡公子亦戰死
齊人立厲公子赤是爲文公誅殺厲公者七十人
十五年衛釐侯薨太子餘立初餘弟和有寵於釐侯
多予之賂和以賂士襲攻餘於墓上餘入釐侯羨自
殺謚曰共伯和立是爲武公武公脩康叔之政百姓
和集

十六年晉獻侯薨子穆侯弗生立自曲沃徙都絳

十八年蔡夷侯薨子釐侯所事立

二十一年魯懿公兄栝之子伯御與國人攻殺懿公而自立

二十二年封季弟友於鄭伯爵都咸林 王嘗晏起姜后脫簪珥待罪於永巷使其傅母通言於王曰王樂色而忘德失禮而晏起亂之興自婢子始敢請罪王曰寡人不德寔自生過非夫人之罪也自是勤於政事早朝晏罷卒成中興之名

二十三年晉穆侯伐條

二十四年齊文公薨子成公說立

二十六年晉穆侯伐千畝有功初穆侯夫人齊女姜氏以條之役生太子仇千畝之戰生少子成師晉人師服曰仇者讐也成師大號成之者又名自命也物自定也今適庶名反逆晉其能毋亂乎

二十七年宋惠公薨子哀公立

二十八年楚熊紉薨子熊罟立 宋哀公薨子戴公立

立宋政久衰商之禮樂散亡戴公時大夫正考父校商之名頌十二篇於周太師歸以祀其先王

三十年周有馬化爲人 有兔舞于鎬京

三十二年王伐魯殺其君伯御立懿公弟稱是爲孝

公諸侯從是而不睦王欲得國子之能訓導諸侯者
樊穆仲曰魯侯肅恭明神敬事耆老賦事行刑必問
遺訓而咨於故實王曰然則能訓治其民矣乃命孝
公子夷宮 陳釐公薨子武公靈立 曹戴伯薨子
惠伯兕立

三十三年王伐太原戎不克 齊成公薨子莊公購
立周有馬化爲狐

三十四年王征獫狁

三十七年燕釐侯薨子頃侯立 楚熊罥薨子熊儀
立是爲若敖

三十八年王伐條戎奔戎王師敗績

三十九年戰于千畝王師敗績于姜氏之戎王御奄父曰公仲脫宣王奄父趙造父六世孫王既喪南國之師乃料民於太原仲山甫諫曰古者不料民而知其多少且無故而料民天所惡也害於政而妨於後嗣王卒料之

四十年晉敗北戎于汾隰戎滅姜侯之邑

四十一年王征申戎破之

四十三年晉穆侯薨弟殤叔自立太子仇出奔

四十六年初王將殺其臣杜伯而非其罪伯之友左

儒爭之于王九復之而王不許王曰汝別君而異友也儒曰君道友逆則順君以誅友友道君逆則帥友以違君王怒曰易而言則生不易則死儒曰士不枉義以從死不易言以求生臣能明君之過以死杜伯之無罪王殺杜伯左儒死之

王崩子幽王宮涅立

幽王

元年陳武公薨子夷公說立 晉穆侯太子仇攻殺殤叔而自立是爲文侯未幾王無道趙奄父之子叔帶去周如晉事文侯始建趙氏于晉國

二年西周三川皆震伯陽父曰昔伊洛竭而夏亡河
竭而商亾今周德若二代之季矣其川源又塞塞必
竭川竭山必崩國亾不過十年數之紀也是歲三川
竭岐山崩初夏之衰也襄人之神化爲二龍以同王
庭而言曰余襄之二君也夏后卜殺之與去之止之
莫吉卜請其瘞而藏之吉乃布幣而策告之龍亾瘞
在櫝而藏之傳邠之及殷周莫之發也厲王之末發
而觀之瘞流于庭不可除也王使婦人不幃而諫之
化爲玄黿入于王府府之童妾未旣齠而遭之旣笄
而孕當宣王時而生不夫而育懼而棄之時童謠曰

厲弧箕服實亾周國有夫婦鬻是器者王使執而戮
之逃於道而見鄉者後宮童妾所弃妖子夫婦哀其
夜號而取之逸逃于褒褒人褒姒有獄而入於王王
遂置之弃女子出于褒是爲褒姒

三年王之後宮見褒姒而嬖愛之褒姒年十四與虢
石父比而譖申后太子周大夫尹氏及祭公導王爲
非

四年陳夷公薨弟平公癸立 秦莊公三子其長世
父曰戎殺我大父仲我非殺戎王不敢入邑遂讓其
弟爲太子自將擊戎莊公薨太子襄公立

通鑑外紀卷三十一 月紀一 三
六年王命伯士伐六濟之戎軍敗伯士死之 王既
淫亂四夷交侵戎圍犬丘秦世父擊之爲戎所虜歲
餘復歸之

八年王以鄭伯友爲司徒和集周民周民皆說而便
愛之

九年王竟以虢石父褒姒之譖廢申后及太子宜臼
以褒姒爲后其子伯服爲太子宜臼出奔申太史伯
陽曰旣成矣無可奈何褒似不好笑王說之萬方故
不笑有寇至則舉烽火大鼓爲燧褒姒乃大笑諸侯
悉至至而無寇王爲是數舉烽火諸侯不信亦不至

褒姒好聞裂繒聲王發繒裂之以適其意虢石父爲
人佞巧善諛好利王以爲卿用事專任國人皆怨政
治多邪諸侯或畔王室始騷王嘗爲太室之盟戎狄
叛之 鄭伯友問於史伯曰王室多故余懼及焉何
所可以逃死史伯曰濟洛河潁之閒乎其子男之國
虢鄆爲大虢叔恃勢鄆仲恃險君若以周難之故寄
孥與賄不敢不許周亂而弊是驕而貪必將背君君
以成周之衆奉辭伐罪無不克矣若克二邑鄆弊補
丹依黶歷華君之土也修典刑以守之可以少固公
曰周其弊乎對曰今王棄高明昭顯而好讒慝暗昧

惡角犀豐盈而近頑童窮固去和而取同凡周存亾
不過三稔矣時至而求恐無及也鄭伯說乃東寄拏
與賄虢鄆受之十邑皆有寄地虢王季子虢仲之後
國在滎陽南鄰于鄆是爲東虢鄆妘姓高辛火正祝
融黎之後處其祖之故墟溱洧之間周衰鄆君不務
政事而好絜衣服逍遙游燕國小而迫不能自彊於
政治大夫去之鄆之變風始作

十一年王欲殺故太子宜臼求之於申申侯弗予王
伐之申侯於鄆人召西夷犬戎攻王王舉烽火徵兵
兵莫至遂殺王驪山下戲水虜褒姒并殺鄭桓公盡

取周賂而去諸侯卽申立故幽王太子宜臼是爲平
王以奉周祀秦襄公衛武公將兵救周平戎戰甚力
有功鄭人立桓公子掘突是爲武公幽王之末日暈
再重內赤外青有一黑畫上下通在日中牛化爲虎
羊化爲狼

劉恕曰汲冢紀年曰幽王死申侯魯侯許文公立
平王於申虢公翰立王子余二王並立余爲晉文
侯所殺是爲攜王案左傳攜王奸命杜預曰攜王
謂伯服也古文作伯盤皆與舊史不同

資治通鑑外紀卷第三

終

開化圖書館
kuahua library

開化圖書館

Kaishua library

開化圖書館


Kaishua library

開化圖書館

Kaishwa Library



開化圖書館

Kaishwa Library



資治通鑑外紀
—

開館圖書
Kawahara library



TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color